

四庫全書

史部

欽定四庫全書

繹史卷七十九

靈壁縣知縣馬驥撰

陳氏專齊

陳佗之亂附

左傳

隱公六年

五月庚申鄭伯侵陳大獲往歲鄭伯請成于

陳陳侯不許五父諫曰親仁善鄰國之寶也君其許鄭
陳侯曰宋衛實難鄭何能為遂不許君子曰善不可失
惡不可長其陳桓公之謂乎長惡不悛從自及也雖欲
救之其將能乎商書曰惡之易也如火之燎于原不可

鄉邇其猶可撲滅周任有言曰為國家者見惡如農夫之務去草焉芟夷蘊崇之絕其本根勿使能殖則善者信矣

七年

陳及鄭平十二月陳五父如鄭泣盟壬申及

鄭伯盟歆如忘洩伯曰五父必不免不賴盟矣鄭良佐如陳泣盟辛巳及陳侯盟亦知陳之將亂也

公桓

五年

春正月甲戌巳丑陳侯鮑卒再赴也於是陳亂文公子佗殺大子免而代之公疾病而亂作國人分散故再赴

公羊傳曷為以二日卒之憾也甲戌之日亡巳丑之日死而得君子疑焉故以二日卒之也

穀梁傳鮑卒何

為以二日卒之春秋之義信以傳信疑以傳疑陳侯以甲戌之日出己丑之日得不知死之日故舉二日以包也

詩墓門有棘斧以斯之夫也不良國人知之知而不已

誰昔然矣墓門有梅有鵲萃止夫也不良歌以訊之訊

予不顧顛倒思予

詩序墓門刺陳佗也陳佗無良師傳以至於不義惡加於萬民焉列女

傳辨女者陳國採桑之女也晉大夫解居甫使於宋道過陳遇採桑之女止而戲之曰女為我歌我將舍女女乃歌曰墓門有棘斧以斯之夫也

不良國人知之大夫乃服而釋之

穀梁傳

六年蔡人殺陳佗

陳佗者陳君也其曰陳佗何也匹夫

行故匹夫稱之也其匹夫行奈何陳侯熹獵淫獵于蔡

與蔡人爭禽蔡人不知其是陳君也而殺之何以知其

是陳君也兩下相殺不道其不地于蔡也

公羊傳陳佗者何陳君也

陳君則曷為謂之陳佗絕也曷為絕之賤也其賤奈何外淫也惡乎淫淫于蔡蔡人殺之

史記陳桓公鮑卒桓公弟佗其母蔡女故蔡人為佗殺

五父及桓公太子免而立佗是為厲公桓公病而亂作

國人分散故再赴厲公二年生子敬仲完厲公娶蔡女

蔡女與蔡人亂厲公數如蔡淫七年厲公所殺桓公太

子免之三弟長曰躍中曰林少曰杵臼共令蔡人誘厲

公以好女與蔡人共殺厲公而立躍是為利公

○左傳
佗即五

父躍為厲公而無利
公者史記誤舛也

利公立五月卒立中弟林是為

莊公七年卒

穀梁傳莊公元年陳侯
林卒諸侯曰卒正也

少弟杵臼立是

為宣公

詩防有鵲巢邛有旨苕誰侮予美心焉忉忉中唐有甍

邛有旨鵲誰侮予美心焉惕惕

詩序防有鵲巢憂讒賊
也宣公多信讒君子憂

懼

月出皎兮佼人僚兮舒窈窕兮勞心悄悄兮月出皓

兮佼人憫兮舒懣受兮勞心慙兮月出照兮佼人燎兮

舒天紹兮勞心慘兮

詩序月出刺好色也在位不好德而說美色焉

左傳二十二年春陳人殺其大子御寇陳公子完與顓

孫奔齊顓孫自齊來奔齊侯使敬仲為卿辭曰羈旅之

臣幸若獲宥及於寬政赦其不閑於教訓而免於罪戾

弛於負擔君之惠也所獲多矣敢辱高位以速官謗請

以死告詩云翹翹車乘招我以弓豈不欲往畏我友朋

使為工正飲桓公酒樂公曰以火繼之辭曰臣卜其晝

未卜其夜不敢君子曰酒以成禮不繼以淫義也以君
成禮弗納於淫仁也初懿氏卜妻敬仲其妻占之曰吉
是謂鳳皇于飛和鳴鏘鏘有媯之後將育于姜五世其
昌竝於正卿八世之後莫之與京陳厲公蔡出也故蔡
人殺五父而立之生敬仲其少也周史有以周易見陳
侯者陳侯使筮之遇觀䷓之否䷋曰是謂觀國之
光利用賓于王此其代陳有國乎不在此其在異國非
此其身在其子孫光遠而自他有耀者也坤土也巽風

也乾天也風為天於土上山也有山之材而照之以天
光於是乎居土上故曰觀國之光利用賓于王庭實旅
百奉之以玉帛天地之美具焉故曰利用賓于王猶有
觀焉故曰其在後乎風行而著于土故曰其在異國乎
若在異國必姜姓也姜大嶽之後也山嶽則配天物莫
能兩大陳衰此其昌乎及陳之初亡也陳桓子始大於
齊其後亡也成子得政穀梁傳言公子而不言大夫公
子未命為大夫也其曰公子何
也公子之重視大
夫命以執公子

史記完之奔齊齊桓公立十四年矣完卒諡為敬仲仲
生穉孟夷敬仲之如齊以陳字為田氏田穉孟夷生湣
孟莊田湣孟莊生文子湏無田文子事齊莊公生桓子
無宇田桓子無宇有力事齊莊公甚有寵

左傳

襄公二十九年

齊高子容與宋司徒見知伯女齊相禮賔

出司馬侯言於知伯曰二子皆將不免子容專司徒侈
皆亡家之主也知伯曰何如對曰專則速及侈將以其
力斃專則人實斃之將及矣 秋九月齊公孫蠆公孫

竈放其大夫高止於北燕乙未出書曰出奔罪高止也

高止好以事自為功且專故難及之

穀梁傳其曰北燕從史文也

為高氏之難故高豎以盧叛十月庚寅閭丘嬰帥師圍

盧高豎曰苟使高氏有後請致邑齊人立敬仲之曾孫

鄰良敬仲也十一月乙卯高豎致盧而出奔晉晉人城

緜而寘旃

三十一年

齊子尾害閭丘嬰欲殺之使帥師以

伐陽州我問師故夏五月子尾殺閭丘嬰以說于我師

工倭灑消竈孔虺賈寅出奔莒出羣公子

昭公三年既成

昏晏子受禮叔向從之宴相與語叔向曰齊其何如晏
子曰此季世也吾弗知齊其為陳氏矣公棄其民而歸
於陳氏齊舊四量豆區釜鍾四升為豆各自其四以登
於釜釜十則鍾陳氏三量皆登一焉鍾乃大矣以家量
貸而以公量收之山木如市弗加於山魚鹽蜃蛤弗加
於海民參其力二入於公而衣食其一公聚朽蠹而三
老凍餒國之諸市屢賤踊貴民人痛疾而或燠休之其
愛之如父母而歸之如流水欲無獲民將焉辟之箕伯

直柄虞遂伯戲其相胡公大姬已在齊矣叔向曰然雖
吾公室今亦季世也戎馬不駕卿無軍行公乘無人卒
列無長庶民罷敝而宮室滋侈道殣相望而女富溢尤
民間公命如逃寇讎藥卻胥原狐續慶伯降在卑隸政
在家門民無所依君日不悛以樂悵憂公室之卑其何
日之有讒鼎之銘曰昧旦丕顯後世猶怠況日不悛其
能久乎晏子曰子將若何叔向曰晉之公族盡矣胙聞
之公室將卑其宗族枝葉先落則公從之胙之宗十一

族唯羊舌氏在而已肸又無子公室無度幸而得死豈其獲祀初景公欲更晏子之宅曰子之宅近市湫隘蹢躅塵不可以居請更諸典塏者辭曰君之先臣容焉臣不足以嗣之於臣侈矣且小人近市朝夕得所求小人之利也敢煩里旅公笑曰子近市識貴賤乎對曰既利之敢不識乎公曰何貴何賤於是景公繫於刑有鬻踊者故對曰踊貴屨賤既已告於君故與叔向語而稱之景公為是省於刑君子曰仁人之言其利溥哉晏子一言

而齊侯省刑詩曰君子如祉亂庶遄已其是之謂乎及
晏子如晉公更其宅反則成矣既拜乃毀之而為里室
皆如其舊則使宅人反之且諺曰非宅是卜唯鄰是卜
二三子先卜鄰矣違卜不祥君子不犯非禮小人不犯
不祥古之制也吾敢違諸乎卒復其舊宇公弗許因陳

桓子以請乃許之

史記齊景公使晏嬰於晉晏嬰與晉叔向語嬰曰齊之政後卒歸田氏叔

向亦曰晉國之政將歸六卿六卿侈矣而吾君不能恤也景公使晏嬰之晉與叔向私語曰齊政卒歸田氏田氏雖無大德以公權私有德於民民愛之齊使晏嬰如晉與叔嚮語叔嚮曰晉季世也公厚賦為臺池而

不恤政政在私門其可久乎晏子然之。○史記載此語見於趙齊晉世家各不同詳略之宜也。○韓非子景公過晏子曰子宮小近市請徙子家豫章之圃晏子再拜而辭曰且嬰家貧待市食而朝暮趨之不可以遠景公笑曰子家習市識貴賤乎是時景公繁於刑晏子對曰踴貴而屨賤景公曰何故對曰刑多也景公造然變色曰寡人其暴乎於是損刑五或曰晏子之貴踴非其誠也欲便辭以止多刑也此不察治之患也夫刑當無多不當無少無以不當聞而以太多說無術之患也敗軍之誅以千百數猶北且不止即治亂之刑如恐不勝而姦尚不盡今晏子不察其當否而以太多為說不亦妄乎夫惜草茅者耗禾穗惠盜賊者傷良民今緩刑罰行寬惠是利姦邪而害善人也此非所以為治也

晏子叔向問晏子曰齊國之德衰矣今子何若晏子對

曰嬰聞事明君者竭心力以沒其身行不逮則退不以
誣持祿事惰君者優游其身以沒其世力不能則去不
以諛持危且嬰聞君子之事君也進不失忠退不失行
不苟合以隱忠可謂不失忠不持利以傷廉可謂不失
行叔向曰善哉詩有之曰進退維谷其此之謂歟

左傳齊公孫竈卒司馬竈見晏子曰又喪子雅矣晏子
曰惜也子旗不免殆哉姜族弱矣而嬀將始昌二惠競
爽猶可又弱一个焉姜其危哉

八年七月甲戌齊子尾

卒子旗欲治其室丁丑殺梁嬰八月庚戌逐子成子工
子車皆來奔而立子良氏之宰其臣曰孺子長矣而相
吾室欲兼我也授甲將攻之陳桓子善於子尾亦授甲
將助之或告子旗子旗不信則數人告將往又數人告
於道遂如陳氏桓子將出矣聞之而還游服而逆之請
命對曰聞彊氏授甲將攻子子聞諸曰弗聞子盍亦授
甲無字請從子旗曰子胡然彼孺子也吾誨之猶懼其
不濟吾又寵秩之其若先人何子盍謂之周書曰惠不

惠茂不茂康叔所以服弘大也桓子稽顙曰頃靈福子
吾猶有望遂和之如初

十
年齊惠藥高氏皆耆酒信內

多怨彊於陳鮑氏而惡之夏有告陳桓子曰子旗子良
將攻陳鮑亦告鮑氏桓子授甲而如鮑氏遭子良醉而
騁遂見文子則亦授甲矣使視二子則皆將飲酒桓子
曰彼雖不信聞我授甲則必逐我及其飲酒也先伐諸
陳鮑方睦遂伐藥高氏子良曰先得公陳鮑焉往遂伐
虎門晏平仲端委立于虎門之外四族召之無所往其

徒曰助陳鮑乎曰何善焉助欒高乎曰庸愈乎然則歸乎曰君伐焉歸公召之而後入公卜使王黑以靈姑鉞率吉請斷三尺焉而用之五月庚辰戰于穆欒高敗又敗諸莊國人追之又敗諸鹿門欒施高彊來奔陳鮑分其室晏子謂桓子必致諸公讓德之主也讓之謂懿德凡有血氣皆有爭心故利不可強思義為愈義利之本也蘊利生孽姑使無蘊乎可以滋長桓子盡致諸公而請老子莒桓子召子山私具幄幕器用從者之衣屨而

反棘焉子商亦如之而反其邑子周亦如之而與之夫
于反子城子公公孫捷而皆益其祿凡公子公孫之無
祿者私分之邑國之貧約孤寡者私與之粟曰詩云陳
錫載周能施也桓公是以霸公與桓子莒之旁邑辭穆
孟姬為之請高唐陳氏始大 昭子至自晉大夫皆見
高彊見而退昭子語諸大夫曰為人子不可不慎也哉
昔慶封亡子尾多受邑而稍致諸君君以為忠而甚寵
之將死疾于公宮輦而歸君親推之其子不能任是以

在此忠為令德其子弗能任罪猶及之難不慎也喪夫
人之力棄德曠宗以及其身不亦害乎詩曰不自我先
不自我後其是之謂乎魯連子陳無宇謂門客曰昔荆
門客對曰君車衣文繡士不得以為緣鵝鴨有餘食士
不足菽稗堂上有酒池士不得一嘗財者君所輕死者
士所重若不以此所輕與人而欲得
人所重不亦難乎○此語亦屢見

史記無宇卒生武子開與釐子乞田釐子乞事齊景公
為大夫其收賦稅於民以小斗受之其粟與民以大斗
行陰德於民而景公弗禁由此田氏得齊衆心宗族益

彊民思田氏

左傳

二十六年

齊侯與晏子坐於路寢公歎曰美哉室其誰

有此乎晏子曰敢問何謂也公曰吾以為在德對曰如君之言其陳氏乎陳氏雖無大德而有施於民豆區釜鍾之數其取之公也薄其施之民也厚公厚斂焉陳氏厚施焉民歸之矣詩曰雖無德與女式歌且舞陳氏之施民歌舞之矣後世若少惰陳氏而不亡則國其國也已公曰善哉是可若何對曰唯禮可以已之在禮家施

不及國民不遷農不移工賈不變士不濫官不滔大夫
不收公利公曰善哉我不能矣吾今而後知禮之可以
為國也對曰禮之可以為國也久矣與天地並君令臣
共父慈子孝兄愛弟敬夫和妻柔姑慈婦聽禮也君令
而不違臣共而不貳父慈而教子孝而箴兄愛而友弟
敬而順夫和而義妻柔而正姑慈而從婦聽而婉禮之
善物也公曰善哉寡人今而後聞此禮之上也對曰先
王所稟於天地以為其民也是以先王上之

韓非子齊
景公之晉

從平公飲師曠侍坐景公問政於師曠曰太師將奚以
教寡人師曠曰君必惠民而已中坐酒酣將出又復問
政於師曠曰太師奚以教寡人曰君必惠民而已矣景
公出之舍師曠送之又問政於師曠師曠曰君必惠民
而已矣景公歸思未醒而得師曠之所謂公子尾公子
夏者景公之二弟也甚得齊民家富貴而民說之擬於
公室此危吾位者也今謂我惠民者使我與二弟爭民
邪於是反國發廩粟以賦衆貧散府餘財以賜孤寡倉
無陳粟府無餘財宮婦不御者出嫁之七十受祿米鬻
德惠施於民也不與二弟爭民居二年二弟出走公子
夏逃楚公子尾走晉景公與晏子遊於少海登栢寢之
臺而還望其國曰美哉泱泱乎堂堂乎後世將孰有此
晏子對曰其田成氏乎景公曰寡人有此國也而曰田
成氏有之何也晏子對曰夫田成氏甚得齊民其於民
也上之請爵祿行諸大臣下之私大斗斛區釜以出貸
小斗斛區釜以收之殺一牛取一豆肉餘以食士終歲

布帛取二制焉餘以衣士故市木之價不加貴於山澤
之魚鹽龜鼈蠃蚌不貴於海君重斂而田成氏厚施齊
嘗大饑道旁餓死者不可勝數也父子相牽而趨田成
氏者不聞不生故周秦之民相與歌之曰謳乎其已乎
苞乎其往歸田成子乎詩曰雖無德與女式歌且舞今
田成氏之德而民之歌舞民德歸之矣故曰其田成氏
乎公泣然出涕曰不亦悲乎寡人有國而田成氏有之
今為之奈何晏子對曰君何患焉若君欲奪之則近賢
而遠不肖治其煩亂緩其刑罰振貧窮而恤孤寡行恩
惠而給不足民將歸君則雖有十田成氏其如君何或
曰景公不知用勢而師曠晏子不知除患夫獵者託車
與之安用六馬之足使王良佐轡則身不勞而易及輕
獸矣今釋車與之利捐六馬之足與王良之御而下走
逐獸則雖樓季之足無時及獸矣託良馬固車則臧獲
有餘國者君之車也勢者君之馬也夫不處勢以禁誅
擅愛之臣而必德厚以與天下齊行以爭名是皆不乘

君之車不因馬之利舍車而下走者也故曰景公不知用勢之主也而師曠晏子不知除患之臣也子夏曰春秋之記臣殺君子殺父者以十數矣皆非一日之積也有漸而至矣凡姦者行久而成積積成而力多力多而能殺故明主蚤絕之今田常之為亂有漸見矣而君不誅晏子不使其君禁侵陵之臣而使其主行惠故簡公受其禍故子夏曰善持勢者蚤絕姦之萌○公子夏子尾之走未聞景公與田乞同時亦非田成子也此記載多舛

孔叢子夫子適齊晏子就其館既宴其私焉曰齊其危矣譬若載無轄之車以臨千仞之谷其不顛覆亦難冀也子吾心也子以齊為游息之館當或可救子幸不吾

隱也夫子曰夫死病無可為醫夫政令者人君之銜轡所以制下也今齊君失之已久矣子雖欲挾其轡而扶其輪良弗及也抑猶可以終齊君及子之身過此以往齊其田氏矣 孔子見齊景公梁丘據自外而至公曰何遲對曰陳氏戮其小臣臣有辭為是故遲公笑而目孔子曰周書所謂明德慎罰陳子明德也罰人而有辭非不慎矣孔子答曰昔康叔封衛統三監之地命為孟侯周公以成王之命作康誥焉稱述文王之德以成勅

誠之文其書曰惟乃丕顯考文王克明德慎罰克明德者能顯用有德舉而任之也慎罰者并心而慮之衆平然後行之致刑錯也此言其所任不失德所罰不失罪不謂已德之明也公曰寡人不有過言則安得聞吾子之教也

晏子景公有男五人所使傳之者皆有車百乘者也晏子為一馬公召其傅曰勉之將以而所傳為子及晏子晏子辭曰君命其臣據其肩以盡其力臣敢不勉乎今

有之家此一國之權臣也人人以君命命之曰將以而
所傳為子此離樹別黨傾國之道也嬰不敢受命願君
圖之 淳于人納女于景公生孺子荼景公愛之諸田
謀欲廢公子陽生而立荼公以告晏子晏子曰不可夫
以賤匹貴國之害也置大立少亂之本也夫陽生而長
國人戴之君其勿易夫服位有等故賤不陵貴立子有
禮故孽不亂宗願君教荼以禮而勿陷于邪導之以義
而勿湛于利長少行其道宗孽得其倫夫陽生敢毋使

茶饜梁肉之味玩金石之聲而有患乎廢長立少不可以教下尊孽卑宗不可以利所愛長少無等宗孽無別是設賊樹姦之本也君其圖之古之明君非不知繁樂也以為樂淫則哀非不知立愛也以為義失則憂是故制樂以節立子以道若夫恃讒諛以事君者不足以責信今君用讒人之謀聽亂夫之言也廢長立少臣恐後人之有因君之過以資其邪廢少而立長以成其利者君其圖之公不聽景公沒田氏殺君荼立陽生殺陽生

立簡公殺簡公而取齊國

左傳

哀公五年

齊燕姬生子不成而死諸子鬻似之子荼嬖

諸大夫恐其為大子也言於公曰君之齒長矣未有大

子若之何公曰二三子閒於憂虞則有疾疢亦姑謀樂

何憂於無君公疾使國惠子高昭子立荼寘羣公子於

萊秋齊景公卒冬十月公子嘉公子駒公子黔奔衛公

子鉏公子陽生來奔萊人歌之曰景公死乎不與埋三

軍之事乎不與謀師乎師乎何黨之乎

史記景公夫人燕姬適子死景公寵妾芮

姬生子荼荼少其母賤無行諸大夫恐其為嗣乃言願
擇諸子長賢者為太子景公老惡言嗣事又愛荼母
欲立之憚發之口乃謂諸大夫曰為樂耳國何患無君
乎秋景公病命國惠子高昭子立少子荼為太子逐羣
公子遷之萊景公卒太子荼立是為晏孺子冬未葬而
羣公子畏誅皆出亡荼諸異母兄公子壽駒黔奔衛公
子鉏陽生奔魯萊人歌之曰景公死乎弗與理三軍事
乎弗與謀師乎師乎胡黨之乎○史文情事詳盡公
羊傳閏不書此何以書喪以閏數也喪曷為
以閏數喪數略也穀梁傳不正其閏也

六年齊陳

乞偽事高國者每朝必驂乘焉所從必言諸大夫曰彼
皆偃蹇將棄子之命皆曰高國得君必偁我盍去諸固
將謀子子早圖之圖之莫如盡滅之需事之下也及朝

則曰彼虎狼也見我在子之側殺我無日矣請就之位
又謂諸大夫曰二子者禍矣恃得君而欲謀二三子曰
國之多難貴寵之由盡去之而後君定既成謀矣盍及
其未作也先諸作而後悔亦無及也大夫從之夏六月
戊辰陳乞鮑牧及諸大夫以甲入於公宮昭子聞之與
惠子乘如公戰于莊敗國人追之國夏奔莒遂及高張
晏圉弦施來奔 八月齊邴意茲來奔陳僖子使召公
子陽生陽生駕而見南郭且子曰嘗獻馬於季孫不入

於上乘故又獻此請與子乘之出萊門而告之故闕止
知之先待諸外公子曰事未可知反與壬也處戒之遂
行逮夜至於齊國人知之僖子使子士之母養之與饋
者皆入冬十月丁卯立之將盟鮑子醉而往其臣差車
鮑點曰此誰之命也陳子曰受命于鮑子遂誣鮑子曰
子之命也鮑子曰女忘君之為孺子牛而折其齒乎而
背之也悼公稽首曰吾子奉義而行者也若我可不必
亡一大夫若我不可不必亡一公子義則進否則退敢

不唯子是從廢興無以亂則所願也鮑子曰誰非君之
子乃受盟使胡姬以安孺子如賴去鬻姒殺王甲拘江
說囚王豹于句賈之丘公使朱毛告於陳子曰微子則
不及此然君異於器不可以二器二不匱君二多難敢
布諸大夫僖子不對而泣曰君舉不信羣臣乎以齊國
之困困又有憂少君不可以訪是以求長君庶亦能容
羣臣乎不然夫孺子何罪毛復命公悔之毛曰君大訪
於陳子而圖其小可也使毛遷孺子於駘不至殺諸野

幕之下葬諸及冒淳

公羊傳弑而立者不以當國之辭言之此其以當國之辭言之何為諼也此其為諼奈何景公謂陳乞曰吾欲立舍何如陳乞曰所樂乎為君者欲立之則立之不欲立則不立君如欲立之則臣請立之陽生謂陳乞曰吾聞子蓋將不欲立我也陳乞曰夫千乘之主將廢正而立不正必殺正者吾不立子者所以生子者也走矣與之玉節而走之景公死而舍立陳乞迎陽生于諸其家

除景公之喪諸大夫皆在朝陳乞曰常之母有魚菽之
祭願諸大夫之化我也諸大夫皆曰諾於是皆之陳乞
之家坐陳乞曰吾有所為甲請以示焉諸大夫皆曰諾
於是使力士舉巨囊而至于中霤諸大夫見之皆色然
而駭聞之則闖然公子陽生也陳乞曰此君也已諸大
夫不得已皆逡巡北面再拜稽首而君之爾自是往弑
舍穀梁傳陽生入而弑其君以陳乞主之何也不以陽
生君茶也其不以陽生君茶何也陽生正茶不正不
正則其曰君何也茶雖不正已受命矣入者內弗受也
茶不正何用弗受以其受命可以言弗受也陽生其以

國氏何也取
國于荼也

左傳

八年

齊悼公之來也季康子以其妹妻之即位而逆

之季魴侯通焉女言其情弗敢與也齊侯怒夏五月齊

鮑牧帥師伐我取謹及闡

公羊傳外取邑不書此何以書所以賂齊也曷為賂齊為

以邪妻子益來也

穀梁傳惡內也

或譖胡姬於齊侯曰安孺子之黨

也六月齊侯殺胡姬

秋及齊平九月臧賔如如齊泣

盟齊閭丘明來泣盟且逆季姬以歸嬖

國語齊閭丘來盟子服景伯戒宰人曰陷而入於恭閔

馬父笑景伯問之對曰笑吾子之大滿也昔正考父校
商之名頌十二篇於周大師以那為首其輯之亂曰自
古在昔先民有作溫恭朝夕執事有恪先聖王之傳恭
猶不敢專稱曰自古古曰在昔昔曰先民今吾子之戒
吏人曰陷而入於恭其滿之甚也周恭王能庇昭穆之
闕而為恭楚恭王能知其過而為恭今吾子之教官察
曰陷而後恭道將何為

左傳鮑牧又謂羣公子曰使女有馬千乘乎公子愬之

公謂鮑子或譖子子姑居於潞以察之若有之則分室以行若無之則反子之所出門使以三分之一行半道使以二乘及潞廩之以入遂殺之 冬十二月齊人歸讎及闡季姬嬖故也 九年春齊侯使公孟綽辭師于吳吳子曰昔歲寡人聞命今又葦之不知所從將進受命於君 冬吳子使來儆師伐齊

史記田乞卒子常代立是為田成子

左傳

十年

公會吳子邾子郕子伐齊南鄙師于郎齊人弑

悼公赴于師吳子三日哭于軍門之外徐承帥舟師將

自海入齊齊人敗之吳師乃還

吳越春秋夫差北伐齊使大夫高氏謝吳師

曰齊孤立寡國倉庫空虛民人離散齊以吳為疆輔今未往告急而吳見伐請伐國人於郊不敢陳戰爭之辭惟吳哀齊之不

盪也吳師即還

秋吳子使來復傲師 十一年春齊

為鄆故國書高無平帥師伐我及清季孫謂其宰冉求曰齊師在清必魯故也若之何求曰一子守二子從公禦諸竟季孫曰不能求曰居封疆之間季孫告二子二子不可求曰若不可則君無出一子帥師背城而戰不

屬者非魯人也魯之羣室衆於齊之兵車一室敵車優矣子何患焉二子之不欲戰也宜政在季氏當子之身齊人伐魯而不能戰子之恥也大不列於諸侯矣季孫使從於朝俟於黨氏之溝武叔呼而問戰焉對曰君子有遠慮小人何知懿子強問之對曰小人慮材而言量力而共者也武叔曰是謂我不成丈夫也退而蒐乘孟孺子洩帥右師顏羽御邴洩為右冉求帥左師管周父御樊遲為右季孫曰須也弱有子曰就用命焉季氏之

甲七千冉有以武城人三百為已徒卒老幼守宮次于
雩門之外五日右師從之公叔務人見保者而泣曰事
充政重上不能謀士不能死何以治民吾既言之矣敢
不勉乎師及齊師戰于郊齊師自穆曲師不踰溝樊遲
曰非不能也不信子也請三刻而踰之如之衆從之師
入齊軍右師奔齊人從之陳瓘陳莊涉泗孟之側後入
以為殿抽矢策其馬曰馬不進也林不狃之伍曰走乎
不狃曰誰不如曰然則止乎不狃曰惡賢徐步而死師

獲甲首八十齊人不能師宵謀曰齊人遁冉求請從之
三季孫弗許孟孺子語人曰我不如顏羽而賢於邴洩
子羽銳敏我不欲戰而能默洩曰驅之公為與其嬖僮
汪錡乘皆死皆殯孔子曰能執干戈以衛社稷可無殤
也冉有用矛於齊師故能入其軍孔子曰義也

禮記戰于郎公叔禺人遇負杖入保者息曰使之雖病
也任之雖重也君子不能為謀也士弗能死也不可我
則既言矣與其鄰重汪錡往皆死焉魯人欲勿殤重汪

踦問於仲尼仲尼曰能執干戈以衛社稷雖欲勿殤也

不亦可乎

○檀弓

史記田常成子與監止俱為左右相相簡公田常心害
監止監止幸於簡公權弗能去於是田常復修釐子之
政以大斗出貸以小斗收齊人歌之曰姬乎采芑歸乎
田成子

左傳

十四年

齊簡公之在魯也闕止有寵焉及即位使為

政陳成子憚之驟顧諸朝諸御鞅言於公曰陳闕不可

竝也君其擇焉弗聽子我夕陳逆殺人逢之遂執以入
陳氏方睦使疾而遺之潘沐備酒肉焉饗守囚者醉而
殺之而逃子我盟諸陳於陳宗初陳豹欲為子我臣使
公孫言已已有喪而止既而言之曰有陳豹者長而上
僂望視事君子必得志欲為子臣吾憚其為人也故緩
以告子我曰何害是其在我也使為臣他日與之言政
說遂有寵謂之曰我盡逐陳氏而立女若何對曰我遠
於陳氏矣且其違者不過數人何盡逐焉遂告陳氏子

行曰彼得君弗先必禍子子行舍於公宮夏五月壬申
成子兄弟四乘如公子我在幄出逆之遂入閉門侍人
禦之子行殺侍人公與婦人飲酒于檀臺成子遷諸寢
公執戈將擊之大史子餘曰非不利也將除害也成子
出舍于庫聞公猶怒將出曰何所無君子行抽劔曰需
事之賊也誰非陳宗所不殺子者有如陳宗乃止子我
歸屬徒攻闢與大門皆不勝乃出陳氏追之失道於弇
中適豐丘豐丘人執之以告殺諸郭闢成子將殺大陸

子方陳逆請而免之以公命取車於道及彫衆知而東之出雍門陳豹與之車弗受曰逆為余請豹與余車余有私焉事子我而有私於其讎何以見魯衛之士東郭

賈奔衛庚辰陳恒執公于舒州公曰吾早從鞅之言不

及此

說苑齊景公有臣曰諸御鞅諫簡公曰田常與宰

予此二人者甚相憎也臣恐其相攻相攻雖叛而危之

不可願君去一人簡公曰非細人之所敢議也居無幾

何田常果攻宰予於庭賊簡公於朝簡公喟焉太息曰

余不用鞅之言以至此患也故忠臣之言

不可不察也○宰予亦字子我故此訛謬

甲午齊陳

恒弑其君壬子舒州孔丘三日齊而請伐齊三公曰魯

為齊弱久矣子之伐之將若之何對曰陳恒弑其君民之不與者半以魯之衆加齊之半可克也公曰子告季孫孔子辭退而告人曰吾以從大夫之後也故不敢不言

新序陳恒弑君使勇士六人劫子淵棲子淵棲曰子之欲與我以我為知乎臣弑君非知也以我為仁乎見利而背君非仁也以我為勇士劫我以兵懼而與子非勇也使吾無此三者與何補於子若吾有此三者終不從

子矣乃舍之

韓詩外傳田常弑簡公乃盟于國人曰不盟者死及家
石他曰古之事君者死其君之事舍君以全親非忠也
舍親以死君之事非孝也他則不能然不盟是殺吾親
也從人而盟是背吾君也嗚呼生亂世不得正行劫乎
暴人不得全義悲夫乃進盟以免父母退伏劒以死其
君聞之者曰君子哉安之命矣詩曰人亦有言進退惟
谷石先生之謂也

孔叢子墨子曰孔子怒景公之不封已乃樹鵠夷子皮於田常之門詰之

曰夫樹人為信已也記曰孔子適齊惡陳常而終不見常病之亦惡孔子交相惡而又任事其然矣記又曰陳常弑其君孔子齋戒沐浴而朝請討之觀其終不樹子皮審矣

淮南子齊簡公釋其國家之柄而專任其大臣將相攝威擅勢私門成黨而公道不行故使陳成田常鴟夷子皮得成其難使呂氏絕祀而陳氏有國者此柔懦之所生也

說苑陳成子謂鴟夷子皮曰何與常也對曰君死吾不死君亡吾不亡陳成子曰然則何以與常對曰未死去

死未亡去亡其有何死亡矣從命利君謂之順從命病
君謂之諛逆命利君謂之忠逆命病君謂之亂君有過
不諫諍將危國殞社稷也有能盡言於君用則留之不
用則去之謂之諫用則可生不用則死謂之諍有能比
和同力率羣下相與彊矯君君雖不安不能不聽遂解
國之大患除國之大害成於尊君安國謂之輔有能亢
君之命反君之事竊君之重以安國之危除主之辱攻
伐足以成國之大利謂之弼故諫諍輔弼之人社稷之

臣也明君之所尊禮而闇君以為已賊故明君之所賞
闇君之所殺也明君好問闇君好獨明君上賢使能而
享其功闇君畏賢妒能而滅其業罰其忠而賞其賊夫
是之謂至闇桀紂之所以亡也詩云曾是莫聽大命以

傾此之謂也

韓非子鵠夷子皮事田成子田成子去齊走而之燕鵠夷子皮負傳而從至望邑子

皮曰子獨不聞涸澤之蛇乎涸澤蛇將徙有小蛇謂大蛇曰子行而我隨之人以為蛇之行耳必有殺子不如相銜負我以行人必以我為神君也乃相銜負以越公道而行人皆避之曰神君也今子美而我惡以子為我上客千乘之君也以子為我使者萬乘之卿也子不如為我舍人田成子因負傳而隨之至逆旅逆旅之君

待之甚敬因獻酒肉○
田成子走燕其事未聞

孔叢子齊東郭亥從攻田氏執贄見夫子而訪焉夫子
曰子為義也丘不足與計事揖子貢使荅之子貢謂之
曰今子士也位卑而圖大位卑則人不附也圖大則人
憚之殆非子之任也盍姑已乎夫以一縷之任繫千鈞
之重上縣之於無極之高下垂之於不測之深旁人皆
哀其絕而造之者不知其危子之謂乎馬方駭鼓而驚
之繫方絕重而填之馬奔車覆六轡不禁繫絕於高墜

入於深其危必矣東郭亥免戰而跪曰吾已矣願子無
言既而夫子告子貢曰東郭亥欲為義者也子亦告之

以難易則可矣奚至懼之哉

呂氏春秋田成子之所以得有國至今者有兄曰完

子仁且有勇越人興師誅田成子曰奚故殺君而取國
田成子患之完子請率士大夫以逆越師請必戰戰請
必敗敗請必死田成子曰夫必與越戰可也戰必敗敗
必死寡人疑焉完子曰君之有國也百姓怨上賢良又
有死之臣蒙恥以完觀之也國已懼矣今越人起師臣
與之戰戰而敗賢良盡死不死者不敢入於國君與諸
孤處於國以臣觀之國必安矣完子行田成子泣而遣
之夫死敗人之所惡也而反以為安豈一道哉故主人
之聽者與士之
學者不可不博

左傳

十五年

秋齊陳瓘如楚過衛仲由見之曰天或者以

陳氏為斧斤既斲喪公室而他人有之不可知也其使
終饗之亦不可知也若善魯以待時不亦可乎何必惡
焉子玉曰然吾受命矣子使告我弟冬及齊平

田完之奔齊也桓公方霸任賢共國功業正隆而篡
奪已伏矣完陳厲公之子也厲公因亂而死以故完
不得立歷事莊宣二君尋以禦寇之難奔齊辭卿位
而為工正傳穉孟湑孟微而弗顯至文子湏無遭莊


公之弑違齊不遇既而復反於時自晏子以下卓然
不汙於崔慶者文子耳慶氏之敗陳氏有功桓子為
政而陳氏漸彊矣高國齊之命卿也自靈莊以來國
佐殺矣高厚殺矣至是而高止又逐矣吳札來聘識
齊政之有歸韓起泣盟知欒高之必敗二惠弗克保
世而鮑氏復為陳黨其與姜氏耦者誰與夫景公齊
國之顯君也然不能權自上操弭禍亂於方始惟田
獵繁刑之是尚彼陳氏方且驟施於民要譽於國公

在位日久陳氏之得民日深縱令蚤建世子猶恐私行愛憎閒羣子以啓釁況加私昵焉是速之為亂也公承靈莊之後戎姬子牙覆轍匪遠而國儲未正嬖子是寵積欲廢長立少而口不能言諸大夫請命則曰姑樂耳何患無君夫社稷之謀易樹是戒國高受其亂命滋禍所由長也子荼之寵不過奚齊國高之貞不逮荀息而陳鮑之偏又甚於丕里則荼也殆矣先君折齒於孺子乞也舉囊於中雷棄孤忘君豈為

社稷計哉乃孺子既已避位悼公復以為言朱毛贊
謀遷孺子而殺之在陳氏之初志但欲廢君未必弑
君而聖人必以首惡歸之杜氏謂楚比劫立陳乞流
涕歸生憚老皆疑於免罪而禍所由始春秋明書以
為弑主今孺子逾年為君矣舍君而外求君諸大夫
遂再拜稽首而君之義符義隆不能竝生昭業昭文
豈容兩立立則君也廢則讎也陳乞讎之陽生仇之
矣陳乞啓之朱毛弑之矣書曰齊陳乞弑其君荼義

在無可逃也自是以後四年而悼公弑又四年而簡公弑九年之內齊喪三君弑荼者陳乞殺簡者陳恒悼公之弑傳不言為誰然陳氏執政非陳氏孰敢弑其君哉原陳氏所以得行其志者由於景公之不振君務為失民而臣務為得民晏嬰言禮可為國孔子言君臣父子公善之而不能用身歿之後禍不旋踵三君之死非景公其誰尤邪簡公既弑孔子沐浴而請討使請而得也經大書曰齊陳恒弑其君壬公伐

齊殺陳恒春秋二百餘年一大快也請而不得春秋
可以絕筆矣春秋之作以亂臣賊子之故其不作亦
以亂臣賊子之故哉



繹史卷七十九

欽定四庫全書

史部
繹史卷八十

詳校官檢討臣羅國俊

編修臣裴謙覆勘

覆校官博士臣劉光第

校對官中書臣龔禔身

謄錄貢生臣齊兆求

欽定四庫全書

繹史卷八十

靈壁縣知縣馬驥撰

三桓弱魯

仲遂殺適子庶附

左傳

僖公二十二年

東門襄仲將聘于周遂初聘于晉

公羊傳大夫無

遂事此其言遂何公不得為政爾

穀

文公

襄仲如

梁傅以尊遂乎卑此言不敢叛京師也 二年襄仲如齊納幣禮也凡君即位好舅甥脩昏姻娶元妃以奉粢

盛孝也孝禮之始也

公羊傳納幣不書此何以書譏何譏爾譏喪娶也娶在

三年之外則何譏乎喪娶三年之內不圖婚吉禘于莊
公譏然則曷為不於祭焉譏三年之恩疾矣非虛加之
也以人心為皆有之以人心為皆有之則曷為獨於娶
焉譏娶者大吉也非常吉也其為吉者主於已以為有
人心焉者則宜於此焉變矣

春秋繁露春秋譏文公以
喪娶難者曰喪者月不過

三年三年之喪二十五月今按經文公乃四十一月方
娶娶時無喪出其法也矣何以謂之喪娶曰春秋之論
事莫重乎志今娶必納幣納幣之月在喪分故謂之喪
娶也且文公以秋裕祭以冬納幣皆失於大蚤春秋不
譏其前而顧譏其後必以三年之喪肌膚之情也雖從
俗而不能終猶宜未平於心今全無悼遠之志反思念

娶事是春秋之所甚疾也故譏不出三年於首而已譏以喪娶也不別先後賤其無人心也緣此以論禮之所重者在其志志敬而節具則君子子之知禮志和而音雅則君子子之知樂志哀而居約則君子子之知喪故曰非虛加之重志之謂也志為質物為文文著於質質不居文文安施質質文兩備然後其禮成文質偏行不得有我爾之名俱不能備而偏行之寧有質而無文雖弗予能禮尚少善之介葛盧來是也有文無質非直不予乃少惡之謂州公寔來是也然則春秋之序道也先質而後文右志而左物禮云禮云玉帛云乎哉推而前之亦宜曰朝云朝云辭令云乎哉樂云樂云鐘鼓云乎哉引而後之亦宜曰喪云喪云衣服云乎哉是故孔子立新王之道明其貴志以反和見其好誠以滅偽其有繼周之弊故若此也春秋論十二世之事人道決而王道備法布二百四十二年之中相為左右以成文采其居參錯非襲古也是故論春秋者合而通之緣而求

之五其比偶其類覽其緒屠其贅是以人心決而王法立以為不然今夫天子踰年即位諸侯於封內三年稱子皆不在經也而操之與在經無以異非無其辨也有所見而經安受其贅也故能以比貫類以辨付贅者大得之矣人受命於天有善善惡惡之性可養而不可改可豫而不可去若形體之可肥臞而不可得革也是故雖有至賢能為君親含容其惡不能為君親令無惡書曰厥辟去厥祗事親亦然皆忠孝之極也非至賢安能如是父不父則子不子君不君則臣不臣耳文公不能服喪不時奉祭不以三年又以喪娶娶以大夫以卑宗廟亂其羣祖以逆先公小善無一而大惡四五故諸侯弗予命大夫弗為使是惡惡之微不臣之效也出侮於外入奪於內無位之君也孔子曰政逮於大夫四世矣蓋自文公以來之謂也

左傳四年逆婦姜于齊卿不行非禮也君子是以知出姜

之不允於魯也曰貴聘而賤逆之君而卑之立而廢之棄信而壞其主在國必亂在家必亡不允宜哉詩曰畏

天之威于時保之敬主之謂也

公羊傳其謂之逆婦姜于齊何略之也高子曰

娶乎大夫者略之也穀梁傳其曰婦姜為其禮成乎齊也其逆者誰也親逆而稱婦或者公與其連婦之

也曰公也其不言公何也非成禮于齊也曰婦有姑之辭也其不言氏何也賤之也何為賤之也夫人與有賤也

九年卑以致尊病文公也

十六年

有蛇自泉宮出入于國如先君

之數秋八月辛未聲姜薨毀泉臺

公羊傳泉臺者何郎臺也郎臺則曷為謂

之泉臺未成為郎臺既成為泉臺毀泉臺何以書譏何譏爾築之譏毀之譏先祖為之已毀之不如勿居而已

矣穀梁傳喪事不貳貳事緩喪也以文為多失道矣自古為之今毀之不如勿處而已矣十七年

夏四月癸亥葬聲姜有齊難是以緩公羊傳聖姜者何文公之母也

^{十八}年二月丁丑公薨六月葬文公秋襄仲莊叔如齊惠

公立故且拜葬也文公二妃敬嬴生宣公敬嬴嬖而

私事襄仲宣公長而屬諸襄仲襄仲欲立之叔仲不可

仲見于齊侯而請之齊侯新立而欲親魯許之冬十月

仲殺惡及視而立宣公書曰子卒諱之也仲以君命召

惠伯其宰公冉務人止之曰入必死叔仲曰死君命可

也公冉務人曰若君命可死非君命何聽弗聽乃入殺而埋之馬矢之中公冉務人奉其帑以奔蔡既而復叔仲氏夫人姜氏歸于齊大歸也將行哭而過市曰天

乎仲為不道殺適立庶市人皆哭魯人謂之哀姜公羊傳子

率者孰謂謂子赤也何以不日隱之也何隱爾哉也弑則何以不日不忍言也穀梁傳臺下非正也使舉上

客而不稱介不正其同倫而相介故列而數之也子卒不日故也惡宣公也有不待貶絕而罪惡見者有待貶

絕而惡從之者姪娣者不孤子之意也一人有子三人緩帶一日就賢也

史記魯由此公室卑三桓彊

左傳莒紀公生太子僕又生季佗愛季佗而黜僕且多
行無禮於國僕因國人以弑紀公以其寶玉來奔納諸
宣公公命與之邑曰今日必授季文子使司寇出諸竟
曰今日必達公問其故季文子使大史克對曰先大夫
臧文仲教行父事君之禮行父奉以周旋弗敢失隊曰
見有禮於其君者事之如孝子之養父母也見無禮於
其君者誅之如鷹鷂之逐鳥雀也先君周公制周禮曰
則以觀德德以處事事以度功功以食民作誓命曰毀

則為賊掩賊為藏竊賄為盜盜器為姦主藏之名賴姦
之用為大凶德有常無赦在九刑不忘行父還觀呂僕
莫可則也孝敬忠信為吉德盜賊藏姦為凶德夫呂僕
則其孝敬則弑君父矣則其忠信則竊寶玉矣其人則
盜賊也其器則姦兆也保而利之則主藏也以訓則昏
民無則焉不度於善而皆在於凶德是以去之昔高陽
氏有才子八人蒼舒隤鼓檮戴大臨危降庭堅仲容叔
達齊聖廣淵明允篤誠天下之民謂之八愷高辛氏有

才子八人伯奮仲堪叔獻季仲伯虎仲熊叔豹季狸忠肅共懿宣慈惠和天下之民謂之八元此十六族也世濟其美不隕其名以至於堯堯不能舉舜臣堯舉八愷使主后土以揆百事莫不時序地平天成舉八元使布五教于四方父義母慈兄友弟共子孝內平外成昔帝鴻氏有不才子掩義隱賊好行凶德醜類惡物頑嚚不友是與比周天下之民謂之渾敦少皞氏有不才子毀信廢忠崇飾惡言靖譖庸回服讒蒐慝以誣盛德天下

之民謂之窮奇顓頊氏有不才子不可教訓不知話言
告之則頑舍之則嚚傲狠明德以亂天常天下之民謂
之禱杌此三族也世濟其凶增其惡名以至于堯堯不
能去縉雲氏有不才子貪于飲食冒于貨賄侵欲崇侈
不可盈厭聚斂積實不知紀極不分孤寡不恤窮匱天
下之民以比三凶謂之饕餮舜臣堯賓于四門流四凶
族渾敦窮奇禱杌饕餮投諸四裔以禦魑魅是以堯崩
而天下如一同心戴舜以為天子以其舉十六相去四

凶也故虞書數舜之功曰慎徽五典五典克從無違教也曰納于百揆百揆時序無廢事也曰賓于四門四門穆穆無凶人也舜有大功二十而為天子今行父雖未獲一吉人去一凶矣於舜之功二十之一也庶幾免於

戾乎

國語莒太子僕殺紀公以其實來奔宣公使僕人以書命季文子曰夫莒太子不憚以吾故殺其君

而以實來其愛我甚矣為我予之邑今日必授無逆命矣里革遇之而更其書曰夫莒太子殺其君而竊其實來不識窮國又求自適為我流之於夷今日必通無逆命矣明日有司復命公詰之僕人以里革對公執之曰違君命者女亦聞之乎對曰臣以死奮筆奚啻其聞之也臣聞之曰毀則者為賊掩賊者為賊竊寶者為軌用

軌之財者為姦使君為賊姦者不可不去也臣違君命者亦不可不殺也公曰寡人實貪非子之辜也乃舍之

公羊傳稱國以弑何稱

宣元年春王正月

公羊傳繼弑君不言

即位此其言即位何其意也
梁傳繼故而言即位與聞乎故也

公子遂如齊逆女

尊君命也三月遂以夫人婦姜至自齊尊夫人也

公羊傳遂

何以不稱公子一事而再見者卒名也夫人何以不稱姜氏貶曷為貶譏喪娶也喪娶者公也則曷為貶夫人內無貶于公之道也內無貶于公之道則曷為貶夫人夫人與公一體也其稱婦何有姑之辭也穀梁傳其不言氏喪未畢故略之也其日婦緣姑言之之辭也遂之挈由上致之也

夏季文子如齊

納賂以請會會于平州以定公位東門襄仲如齊拜成

六月齊人取濟西之田為立公故以賂齊也

公羊傳外取邑不書

此何以書所以賂齊也曷為賂齊為殺子赤之賂也穀梁傳內不言取言取授之也以是為賂齊也

五年春公如齊高固使齊侯止公請叔姬焉夏公至自

齊書過也秋九月齊高固來逆女自為也故書曰逆叔

姬卿自逆也冬來反馬也

公羊傳何言乎高固之來言叔姬之來而不言高固之來

則不可子公羊子曰其諸為其雙雙而俱至者與梁傳諸侯之嫁子於大夫主大夫以與之來者接內也

不正其接內故不與夫婦之稱也及者及吾子叔姬也為使來者不使得歸之意也七年夏公會

齊侯伐萊不與謀也凡師出與謀曰及不與謀曰會

年有事于大廟襄仲卒而繹非禮也

公羊傳其言至黃乃復何有疾也何

言乎有疾乃復譏何譏爾大夫以君命出聞喪徐行而不反仲遂者何公子遂也何以不稱公子貶曷為貶為哉子赤貶然則曷為不於其貶焉貶於文則無罪於子則無年繹者何祭之明日也萬者何千舞也簫者何簫舞也其言萬入去簫何去其有聲者廢其無聲者存其心焉爾存其心焉爾者何知其不可而為之也猶者何通可以已也穀梁傳乃者亡乎人之辭也復者事畢也不專公命也為若反命而後卒也此公子也其曰仲何也疏之也何為疏之也是不卒者也不疏則無用見其不卒也則其卒之何也以譏乎宣也其譏乎宣何也聞大夫之喪則去樂卒事猶者可以已之辭也繹者祭之旦日之享賓也萬入去簫以其為之變譏之也

冬葬敬嬴旱無麻始用葛弗雨不克葬禮也禮卜葬先

遠日辟不懷也

公羊傳項熊者何宣公之母也而者何難也乃者何難也曷為或言而或言乃

乃難乎而也穀梁傳葬既有日不為雨止禮也雨不克葬喪不以制也而緩辭也足乎日之辭也

十

年春公如齊齊侯以我服故歸濟西之田

公羊傳齊已取之矣其言

我何言我者未絕于我也曷為未絕于我齊言已取之矣其實未之齊也穀梁傳公娶齊齊由以為兄弟反

之不言來公如齊受之也

夏齊惠公卒公如齊奔喪季文子初

聘于齊國武子來報聘

國語定王八年使劉康公聘於魯發幣於大夫季文子孟獻子皆儉叔孫宣子東門子家皆侈歸王問魯大夫

孰賢對曰季孟其長處魯乎叔孫東門其亡乎若家不
忘身必不免王曰何故對曰臣聞之為臣必臣為君必
君寬肅宣惠君也敬恪恭儉臣也寬所以保本也肅所
以濟時也宣所以教施也惠所以和民也本有保則必
固時動而濟則無敗功教施而宣則徧惠以和民則阜
若本固而功成施徧而民阜乃可以長保民矣其何事
不徹敬所以承命也恪所以守業也恭所以給事也儉
所以足用也以敬承命則不違以恪守業則不懈以恭

給事則寬於死以儉足用則遠於憂若承命不違守業
不懈寬於死而遠於憂則可以上下無隙矣其何任不
堪上任事而徹下能堪其任所以為令聞長世也今夫
二子者儉則能足用矣用足則族可以庇二子者侈侈
則不恤匱匱而不恤憂必及之若是則必廣其身且夫
人臣而侈國家弗堪亡之道也王曰幾何對曰東門之
位不若叔孫而泰侈焉不可以事二君叔孫之位不若
季孟而亦泰侈焉不可以事三君若皆蚤世猶可若登

年以載其毒必亡十六年魯宣公卒赴者未及東門氏
來告亂子家奔齊簡王十一年魯叔孫宣伯亦奔齊成
公未沒二年

左傳

十四年

冬公孫歸父會齊侯于穀見晏桓子與之言

魯樂桓子告高宣子曰子家其亡乎懷於魯矣懷必貪
貪必謀人謀人人亦謀已一國謀之何以不亡

十五年

初稅畝非禮也穀出不過藉以豐財也

公羊傳初者何始也稅畝者何

履畝而稅也初稅畝何以書譏何譏爾譏始履畝而稅也何譏乎始履畝而稅古者什一而藉古者曷為什一

而藉什一者天下之中正也多乎什一大桀小桀寡乎什一大貉小貉什一者天下之中正也什一行而頌聲作矣穀梁傳初者始也古者什一藉而不稅初稅畝非正也古者三百步為里名曰井田井田者九百畝公田居一私田稼不善則非吏公田稼不善則非民初稅畝者非公之去公田而履畝十取一也以公之與民為已悉矣古者公田為居井寵葱韭盡取焉

國語宣公夏濫於泗淵里革斷其罟而棄之曰古者大寒降土蟄發水虞於是乎講畧蠲取名魚登川禽而嘗之寢廟行諸國人助宣氣也鳥獸孕水蟲成獸虞於是乎禁罝羅矝魚鼈以為夏槁助生阜也鳥獸成水蟲孕

水虞於是乎禁罝麗設罝鄂以實廟庖畜功用也且夫山不槎蘩澤不伐天魚禁鯢鮪獸長麇麋鳥翼鰈卵蟲舍蚍蜉蕃庶物也古之訓也今魚方別孕不教魚長又行網罟貪無藝也公聞之曰吾過而里革匡我不亦善乎是良罟也為我得法使有司藏之使吾無忘諗師存侍曰藏罟不如寘里革於側之不忘也

左傳

十七年

冬公弟叔肸卒公母弟也凡大子之母弟公

在曰公子不在曰弟凡稱弟皆母弟也

穀梁傳其曰公弟叔肸賢之也其賢之何也宣弑而非之也非之則胡為不去也曰兄弟也何去而之與之財則曰我足矣織屨而食終身不食宣公之食君子以是為通恩也以取貴乎春秋

左傳

年十八

公孫歸父以襄仲之立公也有寵欲去三桓

以張公室與公謀而聘于晉欲以晉人去之冬公薨季文子言於朝曰使我殺適立庶以失大援者仲也夫臧宣叔怒曰當其時不能治也後之人何罪子欲去之許

請去之遂逐東門氏子家還及笙壇帷復命於介既復

命袒括髮即位哭三踊而出遂奔齊書曰歸父還自晉

善之也

公羊傳還者何善辭也何善爾歸父使子晉還自晉至榿聞君薨家遣嬋帷哭君成踊反命乎

介自是走之齊穀梁傳正寢也還者事未畢也自晉事畢也與人之子守其父之殯損殯而奔其父之使者

是以奔父也至榿遂奔齊遂繼事也

公羊傳

成公十五年

仲嬰齊者何公孫嬰齊也公孫嬰齊則

曷為謂之仲嬰齊為兄後也為兄後則曷為謂之仲嬰

齊為人後者為之子也為人後者為其子則其稱仲何

孫以王父字為氏也然則嬰齊孰後後歸父也歸父使
于晉而未反何以後之叔仲惠伯傅子赤者也文公死
子幼公子遂謂叔仲惠伯曰君幼如之何願與子慮之
叔仲惠伯曰吾子相之老夫抱之何幼君之有公子遂
知其不可與謀退而殺叔仲惠伯弑子赤而立宣公宣
公死成公幼臧宣叔者相也君死不哭聚諸大夫而問
焉曰昔者叔仲惠伯之事孰為之諸大夫皆雜然曰仲
氏也其然乎於是遣歸父之家然後哭君歸父使乎晉

還自晉至櫟聞君薨家遣殯帷哭君成踊反命于介自是走之齊魯人徐傷歸父之無後也於是使嬰齊後之

也

穀梁傳此公孫也其曰仲何也子由父疏之也已上仲遂殺適立庶

左傳

成公十一年

秋宣伯聘于齊以脩前好

十三年

三月公

如京師宣伯欲賜請先使王以行人之禮禮焉孟獻子從王以為介而重賄之

國語簡王八年魯成公來朝使叔孫僑如先聘且告見王孫說與之語說言於王曰魯叔孫之來也必有異焉

其享覲之幣薄而言諂殆請之也若請之必欲賜也魯執政唯彊故不歡焉而後遣之且其狀方上而銳下宜觸冒人王其勿賜若貪陵之人來而盈其願是不賞善也且財不給故聖人之施舍也議之其喜怒取予也亦議之是以不主寬惠亦不主猛毅主德義而已王曰諾使私問諸魯請之也王遂不賜禮如行人及魯侯至仲孫蔑為介王孫說與之語說讓說以語王王厚賄之

左傳

十四年

秋宣伯如齊逆女稱族尊君命也九月僞

如以夫人婦姜氏至自齊舍族尊夫人也故君子曰春秋之稱微而顯志而晦婉而成章盡而不汙懲惡而勸善非聖人誰能脩之

穀梁傳大夫不以夫人以夫人非正也刺不親迎也僑如之挈由上

致之

十六年

戰之日齊國佐高無咎至于師衛侯出于

衛公出于壞隤宣伯通于穆姜欲去季孟而取其室將行穆姜送公而使逐二子公以晉難告曰請反而聽命姜怒公子偃公子鉏趨過指之曰女不可是皆君也公待於壞隤申宮傲備設守而後行是以後使孟獻子守

于公宮秋會于沙隨謀伐鄭也宣伯使告卻曄曰魯侯

待于壞隤以待勝者卻曄將新軍且為公族大夫以主

東諸侯取貨于宣伯而訴公于晉侯晉侯不見公

公羊傳不

見公者何公不見見也公不見見大夫執何以致會不

恥也曷為不恥公幼也

穀梁傳不見公者可以見公

也可以見公而不見公譏在諸侯也

七月公會尹武公及諸侯伐鄭將

行姜又命公如初公又申守而行宣伯使告卻曄曰魯

之有季孟猶晉之有欒范也政令於是乎成今其謀曰

晉政多門不可從也寧事齊楚有已而已蔑從晉矣若

欲得志於魯請止行父而殺之我斃蔑也而事晉蔑有貳矣魯不貳小國必睦不然歸必叛矣九月晉人執季文子于莒丘公還待于鄆使子叔聲伯請季孫于晉卻犛曰苟去仲孫蔑而止季孫行父吾與子國親於公室對曰僞如之情子必聞之矣若去蔑與行父是大棄魯國而罪寡君也若猶不棄而惠徼周公之福使寡君得事晉君則夫二人者魯國社稷之臣也若朝亡之魯必夕亡以魯之密邇仇讎亡而為讎治之何及卻犛曰吾

為子請邑對曰嬰齊魯之常隸也敢介大國以求厚焉
承寡君之命以請若得所請吾子之賜多矣又何求范
文子謂欒武子曰季孫於魯相二君矣妾不衣帛馬不
食粟可不謂忠乎信讒慝而棄忠良若諸侯何子叔嬰
齊奉君命無私謀國家不貳圖其身不忘其君若虛其
請是棄善人也子其圖之乃許魯平赦季孫冬十月出
叔孫僑如而盟之僑如奔齊十二月季孫及卻犢盟于
扈歸刺公子偃召叔孫豹于齊而立之

公羊傳執未有言舍之者此其言舍之何仁之也曰在招丘悌矣執未有言仁之者此其言仁之何代公執也其代公執奈何前此者晉人來乞師而不與公會晉侯將執公季孫行父曰此臣之罪也於是執季孫行父成公會屬公會不當期將執公季孫行父曰臣有罪執其君子有罪執其父此聽失之大者也今此臣之罪也舍臣之身而執臣之君吾恐聽失之為宗廟羞也於是執季孫行父

穀梁傳執者不舍而舍公所也執者致而不致公在也何其執而辭也猶存公也存

意公亦存也公存也 大夫日
卒正也先刺後名殺無罪也

左傳齊聲孟子通僑如使立於高國之間僑如曰不可
以再罪奔衛亦聞於卿

十七年

初聲伯夢涉洹或與已

瓊瑰食之泣而為瓊瑰盈其懷從而歌之曰濟洹之水
贈我以瓊瑰歸乎歸乎瓊瑰盈吾懷乎懼不敢占也還
自鄭壬申至于狸服而占之曰余恐死故不敢占也今
衆繁而從余三年矣無傷也言之之莫而卒

公羊傳非此月日也

曷為以此月日卒之待君命然後卒大夫曷為待君命
然後卒大夫前此者嬰齊走之晉公會晉侯將執公嬰

齊為公請公許之反為大夫歸至狸軫而卒無君命不敢卒大夫公至曰吾固許之反為大夫然後卒之穀

梁傳十一月無壬申壬申乃十月也致襄公九年穆姜薨公而後錄臣子之義也其地未踰竟也

於東宮始往而筮之遇艮之八䷳史曰是謂艮之隨

䷐隨其出也君必速出姜曰亡是於周易曰隨元亨

利貞無咎元體之長也亨嘉之會也利義之和也貞事

之幹也體仁足以長人嘉德足以合禮利物足以和義

貞固足以幹事然故不可誣也是以雖隨无咎今我婦

人而與於亂固在下位而有不仁不可謂元不靖國家

不可謂亨作而害身不可謂利棄位而姣不可謂貞有四德者隨而先咎我皆無之豈隨也哉我則取惡能無

咎乎必死於此弗得出也

已上叔孫僞如之亂

左傳

成公十年

已丑公薨于路寢言道也

丁未葬我君

成公書順也

穀梁傳路寢正也男子不絕婦人之手以齊終也襄公元年繼正即位正也史

記是時襄公三歲也

冬衛子叔晉知武子來聘禮也凡諸侯即

位小國朝之大國聘焉以繼好結信謀事補闕禮之大

者也

二年

夏齊姜薨初穆姜使擇美櫝以自為觀與頌

琴季文子取以葬君子曰非禮也禮無所逆婦養姑者也虧姑以成婦逆莫大焉詩曰其惟哲人告之詒言順德之行季孫於是為不哲矣且姜氏君之妣也詩曰為

酒為醴烝畀祖妣以洽百禮降福孔偕

公羊傳齊姜者何齊姜與繆姜

則未知其為宣夫人與成夫人與

穆叔聘于宋通嗣君也

三年公如

晉始朝也夏盟於長檣孟獻子相公稽首知武子曰天子在而君辱稽首寡君懼矣孟獻子曰以敝邑介在東表密邇仇讎寡君將君是望敢不稽首

四年穆叔如晉

報知武子之聘也晉侯享之金奏肆夏之三不拜工歌文王之三又不拜歌鹿鳴之三三拜韓獻子使行人子員問之曰子以君命辱於敝邑先君之禮藉之以樂以辱吾子吾子舍其大而重拜其細敢問何禮也對曰三夏天子所以享元侯也使臣弗敢與聞文王兩君相見之樂也臣不敢及鹿鳴君所以嘉寡君也敢不拜嘉四牡君所以勞使臣也敢不重拜皇皇者華君教使臣曰必諮于周臣聞之訪問於善為咨咨親為詢咨禮為度

咨事為誣咨難為謀臣獲五善敢不重拜

國語叔孫穆子聘於晉晉

悼公饗之樂及鹿鳴之三而後拜樂三晉侯使行人問焉曰子以君命鎮撫敝邑不腆先君之禮以辱從者不腆之樂以節之吾子舍其大而加禮於其細敢問何禮也對曰寡君使豹來繼先君之好君以諸侯之故況使臣以大禮夫先樂金奏肆夏繁遏渠天子所以饗元侯也夫歌文王大明縣則兩君相見之樂也皆昭令德以合好也皆非使臣之所敢聞也臣以為肄業及之故不敢拜今伶簫咏歌及鹿鳴之三君之所以嘉先君之好也敢不拜嘉四牡君之所以章使臣之勤也敢不拜章皇皇者華君教使臣曰每懷靡及誣謀度詢必咨於周敢不拜教臣聞之曰懷和為每懷咨才為誣咨事為謀咨義為度咨親為詢忠信為周君況使臣以大禮重之以六德敢不重拜

秋定如薨不殯于廟無櫬不虞匠慶謂季

文子曰子為正卿而小君之喪不成不終君也君長誰受其咎初季孫為已樹六檟於蒲圃東門之外匠慶請木季孫曰略匠慶用蒲圃之檟季孫不御君子曰志所謂多行無禮必自及也其是之謂乎

公羊傳定弋者何襄公之母也

國語季文子相宣成無衣帛之妾無食粟之馬仲孫它諫曰子為魯上卿相二君矣妾不衣帛馬不食粟人其以子為愛且不華國乎文子曰吾亦願之然吾觀國人其父兄之食麤而衣惡者猶多矣吾是以不敢人之父

兄食麤衣惡而我美妾與馬無乃非相人者乎且吾聞
以德榮為國華不聞以妾與馬文子以告孟獻子獻子
囚之七日自是子服之妾衣不過七升之布馬餼不過
稂莠文子聞之曰過而能改者民之上也使為上大夫
左傳^{五年}李文子卒大夫入斂公在位宰庀家器為葬備
無衣帛之妾無食粟之馬無藏金玉無重器備君子是
以知李文子之忠於公室也相三君矣而無私積可不

謂忠乎

鹽鐵論李文子相魯妾不衣帛馬
不秣粟孔子曰不可大儉極下

說苑衛將軍文子問子貢曰季文子三窮而三通何也
子貢曰其窮事賢其通舉窮其富分貧其貴禮賤窮以
事賢則不侮通而舉窮則忠於朋友富而分貧則宗族
親之貴而禮賤則百姓戴之其得之固道也失之命也
曰失而不得者何也曰其窮不事賢其通不舉窮其富
不分貧其貴不禮賤其得之命也其失之固道也

已上季文

子相魯

左傳

襄公

十五年春宋向戌來聘且尋盟見孟獻子尤其

室曰子有令聞而美其室非所望也對曰我在晉吾兄
為之毀之重勞且不敢聞

新序魯孟獻子聘於晉宣子觴之三徙鐘石之懸不移
而具獻子曰富哉家宣子曰子之家孰與我家富獻子
曰吾家甚貧惟有二士曰顏回茲無靈者使吾邦家安
平百姓和協惟此二者耳吾盡於此矣客出宣子曰彼
君子也以養賢為富我鄙人也以鐘石金玉為富孔子
曰孟獻子之富可著於春秋

韓非子孟獻伯相魯堂下生藿藜門外長荆棘食不二
味坐不重席無衣帛之妾居不粟馬出不從車叔向聞
之以告苗賁皇賁皇非之曰是出主之爵祿以附下也
一曰孟獻伯拜上卿叔向往賀門有御馬不食禾向曰
子無二馬二輿何也獻伯曰吾觀國人尚有饑色是以
不秣馬斑白者不徒行故不二輿向曰吾始賀子之拜
卿今賀子之儉也向出語苗賁皇曰助吾賀獻伯之儉
也苗子曰何賀焉夫爵祿旂章所以異功伐別賢不肖

也故晉國之法上大夫二輿二乘中大夫二輿一乘下大夫專乘此明等級也且夫卿必有軍事是故循車馬比卒乘以備戎事有難則以備不虞平夷則以給朝事今亂晉國之政之不虞之備以成節儉以潔私名獻伯之儉也可與又何賀

禮記孟獻子禪縣而不樂比御而不入夫子曰獻子加於人一等矣孟獻子之喪司徒旅歸四布夫子曰可

也○檀弓已上
孟獻子之賢

左傳

襄公七年

南遺為費宰叔仲昭伯為隧正欲善季氏而

求媚於南遺謂遺請城費吾多與而役故季氏城費

秋季武子如衛報子叔之聘且辭緩報非貳也

九年公

送晉侯晉侯以公宴於河上問公年季武子對曰會於

沙隨之歲寡君以生晉侯曰十二年矣是謂一終一星

終也國君十五而生子冠而生子禮也君可以冠矣大

夫盍為冠具武子對曰君冠必以裸享之禮行之以金

石之樂節之以先君之祧處之今寡君在行未可具也

請及兄弟之國而假備焉晉侯曰諾公還及衛冠于成
公之廟假鐘磬焉禮也 十一年春季武子將作三軍
告叔孫穆子曰請為三軍各征其軍穆子曰政將及子
子必不能武子固請之穆子曰然則盟諸乃盟諸僖闕
詛諸五父之衢正月作三軍三分公室而各有其一三
子各毀其乘季氏使其乘之人以其役邑入者無征不
入者倍征孟氏使半為臣若子若弟叔孫氏使盡為臣
不然不舍

國語季武子為三軍叔孫穆子曰不可天子作師公帥之以征不德元侯作師卿帥之以承天子諸侯有卿無軍帥教衛以贊元侯自伯子男有大夫無卿帥賦以從諸侯是以上能征下下無姦慝今我小侯也處大國之間繕貢賦以共從者猶懼有討若為元侯之所以怒大國無乃不可乎弗從遂作中軍自是齊楚代討於魯襄昭皆如楚

公羊傳三軍者何三卿也作三卿何以書譏何譏爾古者上卿下卿上士下士穀梁傳

作為也古者天子六帥諸侯一軍作三軍非正也

左傳

二十一年

冬季武子如宋報向戌之聘也褚師段逆之

以受享賦棠棣之七章以卒宋人重賄之歸復命公享之賦魚麗之卒章公賦南山有臺武子去所曰臣不堪

也

二十九年

公還及方城季武子取卞使公治問璽書追

而與之曰聞守卞者將叛臣帥徒以討之既得之矣敢告公治致使而退及舍而後聞取卞公曰欲之而言叛祇見疏也公問公冶曰吾可以入乎對曰君實有國誰敢違君公與公冶寬服固辭強之而後受公欲無入榮

成伯賦式微乃歸五月公至自楚公治致其邑於季氏而終不入焉曰欺其君何必使余季孫見之則言季氏如他日不見則終不言季氏及疾聚其臣曰我死必無

以冤服斂非德賞也且無使季氏葬我

國語反及方城聞季武子襲卞

公欲還出楚師以伐魯榮成伯曰不可君之於臣其威大矣不能令於國而恃諸侯諸侯其誰睚之若得楚師以伐魯魯既不遠夙之取卞也必用命焉守必固矣若楚之克魯諸姬不獲闚焉而況君乎彼無亦置其同類以服東夷而大據諸夏將天下是王而何德於君其子君也若不克魯君以蠻夷伐之而又求入焉必不獲矣不如予之夙之事君也不敢不懷醉而怒醒而喜庸何傷君其入也乃歸
襄公在楚季武子取卞使季治逆

追而予之璽書以告曰卞人將畔臣討之既得之矣公未言榮成子曰子股肱魯國社稷之事子實制之唯子所利何必卞卞有臯而子征之子之隸也又何謁焉子治歸致祿而不出曰使予欺君謂予能也能而欺其君敢享其祿而立其朝乎

范獻子來聘拜城杞也公享之展莊叔執幣射者三耦公臣不足取於家臣家臣展瑕展王父為一耦公臣公巫召伯仲顏莊叔為一耦鄆鼓父黨叔為一耦

禮記季武子成寢杜氏之葵在西階之下請合葬焉許之入宮而不敢哭武子曰合葬非古也自周公以來未

之有改也吾許其大而不許其細何居命之哭 季武子寢疾蟠固不說齊衰而入見曰斯道也將亡矣士唯公門說齊衰武子曰不亦善乎君子表微及其喪也曾點倚其門而歌

○檀弓已上
季孫宿專政

左傳襄公二十二年春臧武仲如晉雨過御叔御叔在其

邑將飲酒曰焉用聖人我將飲酒而已雨行何以聖為穆叔聞之曰不可使也而傲使人國之蠹也令倍其賦

二十三年季武子無適子公彌長而愛悼子欲立之訪於

申豐曰彌與紇吾皆愛之欲擇才焉而立之申豐趨退
歸盡室將行他日又訪焉對曰其然將具敝車而行乃
止訪於臧紇臧紇曰飲我酒吾為子立之季氏飲大夫
酒臧紇為客既獻臧孫命北面重席新樽絜之召悼子
降逆之大夫皆起及旅而召公鉏使與之齒季孫失色
季氏以公鉏為馬正愠而不出閤子馬見之曰子無然
禍福無門唯人所召為人子者患不孝不患無所敬共
父命何常之有若能孝敬富倍季氏可也姦回不軌禍

倍下民可也公鉏然之敬共朝夕恪居官次季孫喜使
飲已酒而以具往盡舍旃故公鉏氏富又出為公左宰
孟孫惡臧孫季孫愛之孟氏之御騶豐點好羯也曰從
余言必為孟孫再三云羯從之孟莊子疾豐點謂公鉏
苟立羯請讎臧氏公鉏謂季孫曰孺子秩固其所也若
羯立則季氏信有力於臧氏矣弗應已邠孟孫卒公鉏
奉羯立于戶側季孫至入哭而出曰秩焉在公鉏曰羯
在此矣季孫曰孺子長公鉏曰何長之有唯其才也且

夫子之命也遂立羯扶奔邾臧孫入哭甚哀多涕出其
御曰孟孫之惡予也而哀如是季孫若死其若之何臧
孫曰季孫之愛我疾疫也孟孫之惡我藥石也美疾不
如惡石夫石猶生我疾之美其毒滋多孟孫死吾已無
日矣孟氏閉門告於季孫曰臧氏將為亂不使我葬季
孫不信臧孫聞之戒冬十月孟氏將辟藉除於臧氏臧
孫使正夫助之除於東門甲役已而視之孟氏又告季
孫季孫怒命攻臧氏乙亥臧紇斬鹿門之闕以出奔邾

初臧宣叔娶于鑄生賈及為而死繼室以其姪穆姜之
姨子也生紇長於公宮姜氏愛之故立之臧賈臧為出
在鑄臧武仲自邾使告臧賈且致大蔡焉曰紇不佞失
守宗祧敢告不弔紇之罪不及不祀子以大蔡納請其
可賈曰是家之禍也非子之過也賈聞命矣再拜受龜
使為以納請遂自為也臧孫如防使來告曰紇非能害
也知不足也非敢私請苟守先祀無廢二勲敢不辟邑
乃立臧為臧紇致防而奔齊其人曰其盟我乎臧孫曰

無辭將盟臧氏季孫召外史掌惡臣而問盟首焉對曰
盟東門氏也曰毋或如東門遂不聽公命殺適立庶盟
叔孫氏也曰毋或如叔孫僑如欲廢國常蕩賈公室季
孫曰臧孫之罪皆不及此孟椒曰盍以其犯門斬闕季
孫用之乃盟臧氏曰無或如臧孫紇干國之紀犯門斬
闕臧孫聞之曰國有人焉誰居其孟椒乎

穀梁傳其日
正臧孫紇之

出也遽伯玉曰不以
道事其君者其出乎

齊侯將為臧紇田臧孫聞之見
齊侯與之言伐晉對曰多則多矣抑君似鼠夫鼠晝伏

夜動不宄於寢廟畏人故也今君聞晉之亂而後作焉
寧將事之非鼠如何乃弗與田仲尼曰知之難也有臧
武仲之知而不容於魯國抑有由也作不順而施不怨
也夏書曰念茲在茲順事恕施也

已上臧
紇出奔

二十
四年齊人

城邾穆叔如周聘且賀城王嘉其有禮也賜之大路

昭公
四年初穆子去叔孫氏及庚宗遇婦人使私為食而宿

焉問其行告之故哭而送之適齊娶於國氏生孟丙仲
士夢天壓已弗勝顧而見人黑而上僂深目而顴喙號

之曰牛助余乃勝之且而皆召其徒無之且曰志之及
宣伯奔齊饋之宣伯曰魯以先子之故將存吾宗必召
女召女何如對曰願之久矣魯人召之不告而歸既立
所宿庚宗之婦人獻以雉問其姓對曰余子長矣能奉
雉而從我矣召而見之則所夢也未問其名號之曰牛
曰唯皆召其徒使視之遂使為豎有寵長使為政公孫
明知叔孫於齊歸未逆國姜子明取之故怒其子長而
後使逆之田於丘薊遂遇疾焉豎牛欲亂其室而有之

強與孟盟不可叔孫為孟鐘曰爾未際饗大夫以落之
既具使豎牛請日入弗謁出命之日及賓至聞鐘聲牛
曰孟有北婦人之客怒將往牛止之賓出使拘而殺諸
外牛又強與仲盟不可仲與公御菜書觀於公公與之
環使牛入示之入不示出命佩之牛謂叔孫見仲而何
叔孫曰何為曰不見既自見矣公與之環而佩之矣遂
逐之奔齊疾急命名仲牛許而不召杜洩見告之飢渴
授之戈對曰求之而至又何去焉豎牛曰夫子疾病不

欲見人使寘饋于今而退牛弗進則置虛命徹十二月
癸丑叔孫不食乙卯卒牛立昭子而相之公使杜洩葬
叔孫豎牛賂叔仲昭子與南遺使惡杜洩於季孫而去
之杜洩將以路葬且盡卿禮南遺謂季孫曰叔孫未乘
路葬焉用之且冢卿無路介卿以葬不亦左乎季孫曰
然使杜洩舍路不可曰夫子受命於朝而聘於王王思
舊勲而賜之路復命而致之君君不敢逆王命而復賜
之使三官書之吾子為司徒實書名夫子為司馬與工

正書服孟孫為司空以書勲今死而弗以是棄君命也
書在公府而弗以是廢三官也若命服生弗敢服死又
不以將焉用之乃使以葬季孫謀去中軍豎牛曰夫子
固欲去之 五年春王正月舍中軍卑公室也毀中軍
于施氏成諸臧氏初作中軍三分公室而各有其一季
氏盡征之叔孫氏臣其子弟孟氏取其半焉及其舍之
也四分公室季氏擇二二子各一皆盡征之而貢於公
以書使杜洩告於殯曰子固欲毀中軍既毀之矣故告

杜洩曰夫子唯不欲毀也故盟諸僖閔詛諸五父之衢
受其書而投之帥士而哭之叔仲子謂季孫曰帶受命
於子叔孫曰葬鮮者自西門季孫命杜洩杜洩曰卿喪
自朝魯禮也吾子為國政未改禮而又遷之羣臣懼死
不敢自也既葬而行仲至自齊季孫欲立之南遺曰叔
孫氏厚則季氏薄彼實家亂子勿與知不亦可乎南遺
使國人助豎牛以攻諸大庫之庭司官射之中目而死
豎牛取東鄙三十邑以與南遺昭子即位朝其家衆曰

豎牛禍叔孫氏使亂大從殺適立庶又披其邑將以赦
罪罪莫大焉必速殺之豎牛懼奔齊孟仲之子殺諸塞
闕之外投其首於寧風之棘上仲尼曰叔孫昭子之不
勞不可能也周任有言曰為政者不賞私勞不罰私怨
詩云有覺德行四國順之初穆子之生也莊叔以周易
筮之遇明夷䷣之謙䷎以示卜楚丘曰是將行而
歸為子祀以讒人入其名曰牛卒以餒死明夷日也日
之數十故有十時亦當十位自王以下其二為公其三

為卿日上其中食日為二旦日為三明夷之謙明而未
融其當旦乎故曰為子祀日之謙當鳥故曰明夷于飛
明而未融故曰垂其翼象日之動故曰君子于行當三
在旦故曰三日不食離火也艮山也離為火火焚山山
敗於人為言敗言為讒故曰有攸往主人有言言必讒
也純離為牛世亂讒勝勝將適離故曰其名曰牛謙不
足飛不翔垂不峻翼不廣故曰其為子後乎吾子亞卿

也抑少不終

公羊傳舍中軍者何復古也然則曷為不言三卿五亦有中三亦有中

穀梁傳貴

復正也已上叔
孫豎牛之亂

左傳

襄公三十一年

公作楚宮穆叔曰大誓云民之所欲天必

從之君欲楚也夫故作其宮若不復適楚必死是宮也
六月辛巳公薨于楚宮叔仲帶竊其拱壁以與御人納
諸其懷而從取之由是得罪立胡女敬歸之子子野次
于季氏秋九月癸巳卒毀也立敬歸之娣齊歸之子公
子禰穆叔不欲曰大子死有母弟則立之無則立長年
釣擇賢義釣則卜古之道也非適嗣何必娣之子且是

人也居喪而不哀在感而有嘉容是謂不度不度之人

鮮不為患若果立之必為季氏憂武子不聽卒立之比

及葬三易衰衰社如故衰於是昭公十九年矣猶有童

心君子是以知其不能終也癸酉葬襄公

穀梁傳楚宮非正也子卒

日正也昭公元年繼正即位正也

五年公如晉自郊勞至於贈賄無失

禮晉侯謂女叔齊曰魯侯不亦善於禮乎對曰魯侯焉

知禮公曰何為自郊勞至于贈賄禮無違者何故不知

對曰是儀也不可謂禮禮所以守其國行其政令無失

其民者也今政令在家不能取也有子家羈弗能用也
奸大國之盟陵虐小國利人之難不知其私公室四分
民食於他思莫在公不圖其終為國君難將及身不恤
其所禮之本末將於此乎在而屑屑焉習儀以亟言善
於禮不亦遠乎君子謂叔侯於是乎知禮

十一年九月

葬齊歸公不憾晉士之送葬者歸以語史趙史趙曰必
為魯郊侍者曰何故曰歸姓也不思親祖不歸也叔向
曰魯公室其卑乎君有大喪國不廢蒐有三年之喪而

無一日之感國不恤喪不忌君也君無感容不顧親也

國不忌君君不顧親能無卑乎殆其失國

公羊傳齊歸者何昭公之

母也

淮南子魯昭公有慈母而愛之死為

二十夏

之練冠故有慈母之服

世本魯昭公作弁

一年

夏

晉士鞅來聘叔孫為政季孫欲惡諸晉使有司以齊鮑國歸費之禮為士鞅士鞅怒曰鮑國之位下其國小而使鞅從其牢禮是卑敝邑也將復諸寡君魯人恐加四牢焉為十一牢二十五年春叔孫婼聘于宋桐門右師見之語卑宗大夫而賤司城氏昭子告其人曰右師

其亡乎君子貴其身而後能及人是以有禮今夫子卑其大夫而賤其宗是賤其身也能有禮乎無禮必亡宗公享昭子賦新宮昭子賦車轄明日宴飲酒樂宗公使昭子右坐語相泣也樂祁佐退而告人曰今茲君與叔孫其皆死乎吾聞之哀樂而樂哀皆喪心也心之精爽是謂魂魄魂魄去之何以能久季公若之姊為小邾夫人生宗元夫人生子以妻季平子昭子如宗聘且逆之公若從謂曹氏勿與魯將逐之曹氏告公公告樂祁

樂祁曰與之如是魯君必出政在季氏三世矣魯君喪
政四公矣無民而能逞其志者未之有也國君是以鎮
撫其民詩曰人之云亡心之憂矣魯君失民矣焉得逞
其志靖以待命猶可動必憂 初季公鳥娶妻於齊鮑
文子生申公鳥死季公亥與公思展與公鳥之臣申夜
姑相其室及季姒與饗人擅通而懼乃使其妾扶已以
示秦遄之妻曰公若欲使余余不可而扶余又訴於公
甫曰展與夜姑將要余秦姬以告公之公之與公甫告

平子平子拘展於卞而執夜姑將殺之公若泣而哀之
曰殺是是殺余也將為之請平子使豎勿內日中不得
請有司逆命公之使速殺之故公若怨平子季郈之雞
闕季氏介其雞郈氏為之金距平子怒益宮於郈氏且
讓之故郈昭伯亦怨平子臧昭伯之從弟會為讒於臧
氏而逃於季氏臧氏執旃平子怒拘臧氏老將禘於襄
公萬者二人其衆萬於季氏臧孫曰此之謂不能庸先
君之廟大夫遂怨平子公若獻弓於公為且與之出射

於外而謀去季氏公為告公果公賁公賁公賁使侍人僚祖告公公寢將以戈擊之乃走公曰執之亦無命也懼而不出數月不見公不怒又使言公執戈以懼之乃走又使言公曰非小人之所及也公果自言公以告臧孫臧孫以難告邠孫邠孫以可勸告子家懿伯懿伯曰讒人以君徼幸事若不克君受其名不可為也舍民數世以求克事不可必也且政在焉其難圖也公退之辭曰臣與聞命矣言若洩臣不獲死乃館於公叔孫昭子

如闕公居於長府九月戊戌伐季氏殺公之于門遂入之平子登臺而請曰君不察臣之罪使有司討臣以干戈臣請待於沂上以察罪弗許請囚于費弗許請以五乘亡弗許子家子曰君其許之政自之出久矣隱民多取食焉為之徒者衆矣日入慝作弗可知也衆怒不可蓄也蓄而弗治將蒞蒞蓄民將生心生心同求將合君必悔之弗聽邱孫曰必殺之公使邱孫逆孟懿子叔孫氏之司馬懿戾言於其衆曰若之何莫對又曰我家臣

也不敢知國凡有季氏與無於我孰利皆曰無季氏是無叔孫氏也駸戾曰然則救諸帥徒以往陷西北隅以入公徒釋甲執冰而踞遂逐之孟氏使登西北隅以望季氏見叔孫氏之旌以告孟氏執郈昭伯殺之於南門之西遂伐公徒子家子曰諸臣偽劫君者而負罪以出君止意如之事君也不敢不改公曰余不忍也與臧孫如墓謀遂行己亥公孫于齊次于陽州齊侯將唁公于平陰公先至于野并齊侯曰寡人之罪也使有司待于

平陰為近故也書曰公孫于齊次于陽州齊侯唁公于野井禮也將求於人則先下之禮之善物也齊侯曰自莒疆以西請致千社以待君命寡人將帥敝賦以從執事唯命是聽君之憂寡人之憂也公喜子家子曰天祿不再天若胙君不過周公以魯足矣失魯而以千社為臣誰與之立且齊君無信不如早之晉弗從臧昭伯率從者將盟載書曰勑力壹心好惡同之信罪之有無繼繼從公無通外內以公命示子家子子家子曰如此吾

不可以盟羈也不佞不能與二三子同心而以為皆有
罪或欲通外內且欲去君二三子好亡而惡定焉可同
也陷君於難罪孰大焉通外內而去君君將速入弗通
何為而何守焉乃不與盟昭子自闕歸見平子平子稽
顙曰子若我何昭子曰人誰不死子以逐君成名子孫
不忘不亦傷乎將若子何平子曰苟使意如得改事君
所謂生死而肉骨也昭子從公于齊與公言子家子命
適公館者執之公與昭子言於幄內曰將安衆而納公

公徒將殺昭子伏諸道左師展告公公使昭子自鑄歸
平子有異志冬十月辛酉昭子齊於其寢使祝宗祈死
戊辰率左師展將以公乘馬而歸公徒執之

公羊傳唁公者何昭公將弑李氏告子家駒曰李氏為
無道僭於公室久矣吾欲弑之何如子家駒曰諸侯僭
於天子大夫僭於諸侯久矣昭公曰吾何僭矣哉子家
駒曰設兩觀乘大路朱干玉戚以舞大夏八佾以舞大
武此皆天子之禮也且夫牛馬維婁委已者也而柔焉

季氏得民衆久矣君無多辱焉昭公不從其言終弑而敗焉走之齊齊侯唁公于野井曰奈何君去魯國之社稷昭公曰喪人不佞失守魯國之社稷執事以羞再拜
顙慶子家駒曰慶子免君於大難矣子家駒曰臣不佞陷君於大難君不忍加之以鈇鑕賜之以死再拜顙高
子執簞食與四脰脯國子執壺漿曰吾寡君聞君在外餒饗未就敢致糗於從者昭公曰君不忘吾先君延及
喪人錫之以大禮再拜稽首以社受高子曰有夫不祥

君無所辱大禮昭公蓋祭而不嘗景公曰寡人有不腆
先君之服未之敢服有不腆先君之器未之敢用敢以
請昭公曰喪人不佞失守魯國之社稷執事以羞敢辱
大禮敢辭景公曰寡人有不腆先君之服未之敢服有
不腆先君之器未之敢用敢固以請昭公曰以吾宗廟
之在魯也有先君之服未之能以服有先君之器未之
能以出敢固辭景公曰寡人有不腆先君之服未之敢
服有不腆先君之器未之敢用請以饗乎從者昭公曰

喪人其何稱景公曰孰君而無稱昭公於是噉然而哭

諸大夫皆哭既哭以人為菑以幣為席以鞶為几以遇

禮相見孔子曰其禮與其辭足觀矣

○曲折摹寫情景如見穀梁傳孫之

為言猶孫也諱奔也次止也弔失國曰唁唁公不得入於魯也晏子魯昭公棄國走齊齊公問焉曰若何年

之少而棄國之蚤奚道至于此乎昭公對曰吾少之時人多愛我者吾體不能親人多諫我者吾志不能用是則內無拂而外無輔輔拂無一人諂諛我者甚衆譬之猶秋蓬也孤其根而美枝葉秋風一至根且拔矣景公辯其言以語晏子曰使是人反其國豈不為古之賢君乎晏子對曰不然夫愚者多悔不肖者自賢溺者不問墜迷者不問路溺而後問墜迷而後問路譬之猶臨難而遽鑄兵噎而遽掘井雖速亦無及已○說苑昭公作

哀侯
非

左傳十一月宋元公將為公故如晉夢大子欒即位於廟已與平公服而相之且召六卿公曰寡人不佞不能事父兄以為二三子憂寡人之罪也若以羣子之靈獲保首領以歿唯是楸拊所以藉幹者請無及先君仲幾對曰君若以社稷之故私降昵宴羣臣弗敢知若夫宗國之法死生之度先君有命矣羣臣以死守之弗敢失隊臣之失職常刑不赦臣不忍其死君命祇辱宗公遂

行已亥卒于曲棘

公羊傳曲棘者何宋之邑也諸侯卒其封內不地此何以地憂內也穀

梁傳邾公也

十二月庚辰齊侯圍鄆

公羊傳外取邑不書此何以書為公取之

也穀梁傳取易辭也內不言取以其為公取之故易言之也

初臧昭伯如晉臧會

竊其寶龜僂句以下為信與僭僭吉臧氏老將如晉問

會請往昭伯問家故盡對及內子與母弟叔孫則不對

再三問不對歸及郊會逆問又如初至次於外而察之

皆無之執而戮之逸奔郕郕假使為賈正焉計於季

氏臧氏使五人以戈楯伏諸桐汝之間會出逐之反奔

執諸季氏中門之外平子怒曰何故以兵入吾門拘臧氏老季臧有惡及昭伯從公平子立臧會會曰僕句不余欺也 二十六年春王正月庚申齊侯取鄆 葬宋元公如先君禮也 三月公至自齊處于鄆言魯地也夏齊侯將納公命無受魯貨申豐役女賈以幣錦二兩縛一如瑱適齊師謂子猶之人高齎能貨子猶為高氏後粟五千廩高齎以錦示子猶子猶欲之齎曰魯人買之百兩一布以道之不通先入幣財子猶受之言於齊

侯曰羣臣不盡力於魯君者非不能事君也然據有異
焉宋元公為魯君如晉卒於曲棘叔孫昭子求納其君
無疾而死不知天之棄魯耶抑魯君有罪於鬼神故及
此也君若待于曲棘使羣臣從魯君以卜焉若可師有
濟也君而繼之茲無敵矣若其無成君無辱焉齊侯從
之使公子鉏帥師從公成大夫公孫朝謂平子曰有都
以衛國也請我受師許之請納質弗許曰信女足矣告
於齊師曰孟氏魯之敝室也用成已甚弗能忍也請息

肩于齊齊師圍成成人伐齊師之飲馬于淄者曰將以厭衆魯成備而後告曰不勝衆師及齊師戰于炊鼻齊子淵捷從洩聲子射之中楯瓦繇胸汰輶七入者三寸聲子射其馬斬鞅殪改駕人以為駸戾也而助之子車曰齊人也將擊子車子車射之殪其御曰又之子車曰衆可懼也而不可怒也子囊帶從野洩叱之洩曰軍無私怒報乃私也將亢子又叱之亦叱之冉豎射陳武子中手失弓而罵以告平子曰有君子白皙鬢鬚眉甚口

平子曰必子彊也無乃亢諸對曰謂之君子何敢亢之

林雍羞為顏鳴右下苑何忌取其耳顏鳴去之苑子之

御曰視下顧苑子刺林雍斷其足鑿而乘於他車以歸

顏鳴三入齊師呼曰林雍乘

穀梁傳公次于陽州其曰至自齊何也以齊侯之見

公可以言至自齊也居于鄆者公在外也至自齊道義不外公也非國不言圖所以言圖者以大公也

秋盟于鄆陵謀納公也

穀梁傳公在外也至自會道義不外公也

二十七

年春公如齊公至自齊處于鄆言在外也

穀梁傳公在外也

秋會于扈令戍周且謀納公也宋衛皆利納公固請之

范獻子取貨於季孫謂司城子梁與北宮貞子曰季孫未知其罪而君伐之請囚請亡於是乎不獲君又弗克而自出也夫豈無備而能出君乎季氏之復天救之也休公徒之怒而啓叔孫氏之心不然豈其伐人而說甲執冰以游叔孫氏懼禍之濫而自同於季氏天之道也魯君守齊三年而無成季氏甚得其民淮夷與之有十年之備有齊楚之援有天之贊有民之助有堅守之心有列國之權而弗敢宣也事君如在國故鞅以為難二

子皆圖國者也而欲納魯君鞅之願也請從二子以圖魯無成死之二子懼皆辭乃辭小國而以難復 孟懿

子陽虎伐鄆鄆人將戰子家子曰天命不怙久矣使君亡者必此衆也天既禍之而自福也不亦難乎猶有鬼神此必敗也嗚呼為無望也夫其死於此乎公使子家子如晉公徒敗于且知 冬公如齊齊侯請饗之子家子曰朝夕立於其朝又何饗焉其飲酒也乃飲酒使宰獻而請安子仲之子曰重為齊侯夫人曰請使重見子

家子乃以君出 二十八年春公如晉將如乾侯子家

子曰有求於人而即其安人孰矜之其造於竟弗聽使
請逆於晉晉人曰天禍魯國君淹恤在外君亦不使一

介辱在寡人而即安於甥舅其亦使逆君使公復于竟

而後逆之

穀梁傳公
在外也

二十九年春公至自乾侯處于

鄆齊侯使高張來唁公稱主君子家子曰齊卑君矣君

祇辱焉公如乾侯

穀梁傳唁公不
得入于魯也

平子每歲賈馬具

從者之衣屨而歸之于乾侯公執歸馬者賣之乃不歸

馬衛侯求獻其乘馬曰啓服塹而死公將為之櫝子家
子曰從者病矣請以食之乃以帷褰之公賜公衍羔裘
使獻龍輔於齊侯遂入羔裘齊侯喜與之陽穀公衍公
為之生也其母偕出公衍先生公為之母曰相與偕出
請相與偕告三日公為生其母先以告公為為兄公私
喜於陽穀而思於魯曰務人為此禍也且後生而為兄
其誣也久矣乃黜之而以公衍為太子
公羊傳邑不言
潰此其言潰何

郭之也曷為郭之君存焉爾
穀梁傳季孫意如曰叔
倪無病而死此皆無公也是天命也非我罪也
潰之

為言上下不相得也上下不相得則惡
矣亦譏公也昭公出奔民如釋重負

三十年春王

正月公在乾侯不先書鄆與乾侯非公且徵過也

穀梁傳中

國不存公存公故也

三十一年春王正月公在乾侯言不能外

內也晉侯將以師納公范獻子曰若召季孫而不來則
信不臣矣然後伐之若何晉人召季孫獻子使私焉曰
子必來我受其無咎季孫意如會晉荀躒于適歷荀躒
曰寡君使躒謂吾子何故出君有君不事周有常刑子
其圖之季孫練冠麻衣跣行伏而對曰事君臣之所不

得也敢逃刑命君若以臣為有罪請囚于費以待君之
察也亦唯君若以先臣之故不絕季氏而賜之死若弗
殺弗亡君之惠也死且不朽若得從君而歸則固臣之
願也敢有異心夏四月季孫從知伯如乾侯子家子曰
君與之歸一慙之不忍而終身慙乎公曰諾衆曰在一
言矣君必逐之荀躒以晉侯之命唁公且曰寡君使躒躒
以君命討於意如意如不敢逃死君其入也公曰君惠
顧先君之好施及亡人將使歸糞除宗祧以事君則不

能見夫人已所能見夫人者有如河荀躒掩耳而走曰寡君其罪之恐敢與知魯國之難臣請復於寡君退而謂季孫君怒未怠子姑歸祭子家子曰君以一乘入于

魯師季孫必與君歸公欲從之衆從者脅公不得歸

穀梁

傳唁公不得入于魯也曰既為君言之矣不可者意如也

三十二年春王正月公

在乾侯言不能外內又不能用其人也 十二月公疾徧賜大夫大夫不受賜子家子雙琥一環一璧輕服受之大夫皆受其賜己未公薨子家子反賜於府人曰吾

不敢逆君命也大夫皆反其賜書曰公薨于乾侯言失其所也趙簡子問於史墨曰季氏出其君而民服焉諸侯與之君死於外而莫之或罪也對曰物生有兩有三有五有陪貳故天有三辰地有五行體有左右各有妃耦王有公諸侯有卿皆有貳也天生季氏以貳魯侯為日久矣民之服焉不亦宜乎魯君世從其失季氏世脩其勤民忘君矣雖死於外其誰矜之社稷無常奉君臣無常位自古以然故詩曰高岸為谷深谷為陵三后之

姓於今為庶主所知也在易卦雷乘乾曰大壯䷡天
之道也昔成季友桓之季也文姜之愛子也始震而卜
卜人謁之曰生有嘉聞其名曰友為公室輔及生如卜
人之言有文在其手曰友遂以名之既而有大功於魯
受費以為上卿至於文子武子世增其業不廢舊績魯
文公薨而東門遂殺適立庶魯君於是乎失國政在季
氏於此君也四公矣民不知君何以得國是以為君慎
器與名不可以假人

公羊傳

定公元年

定何以無正月正月者正即位也定無正

月者即位後也即位何以後昭公在外得入不得入未

可知也曷為未可知在季氏也定哀多微辭主人習其

讀而問其傳則未知已之有罪焉爾

穀梁傳不言正月定無正也定之無

正何也昭公之終非正終也定之始非正始也昭無正終故定無正始不言即位喪在外也

左傳夏叔孫成子逆公之喪于乾侯季孫曰子家子亟

言於我未嘗不中吾志也吾欲與之從政子必止之且

聽命焉子家子不見叔孫易幾而哭叔孫請見子家子

子家子辭曰羈未得見而從君以出君不命而薨羈不敢見叔孫使告之曰公衍公為實使羣臣不得事君若公子宗主社稷則羣臣之願也凡從君出而可以入者將唯子是聽子家氏未有後季孫願與子從政此皆季孫之願也使不敢以告對曰若立君則有卿士大夫與守龜在羈弗敢知若從君者則貌而出者入可也寇而出者行可也若羈也則君知其出也而未知其入也羈將逃也喪及壞墮公子宗先入從公者皆自壞墮反六

月癸亥公之喪至自乾侯戊辰公即位季孫使役如闕
公氏將溝焉榮駕鵠曰生不能事死又離之以自旌也
縱子忍之後必或恥之乃止季孫問於榮駕鵠曰吾欲
為君謚使子孫知之對曰生弗能事死又惡之以自信
也將焉用之乃止秋七月癸巳葬昭公於墓道南孔子
之為司寇也溝而合諸墓昭公出故季平子禱于煬公
九月立煬宮

穀梁傳殯然後即位也定無正見無以正也踰年不言

即位是有故公也言即位是無故公也即位授受之道也先君無正終則後君無正始也先君有正終則後君有正始也戊辰公即位謹之也定之即位不可不察也公即位何以日也戊辰之日然後即位也癸亥公之喪至自乾侯何為戊辰之日然後即位也正君乎國然後即位也沈子曰正棺乎兩楹之間然後即位也內之大事日即位君之大事也其不日何也以年決者不以日決也此則其日何也著之也何著焉踰年即位厲也於

厲之中又有義焉未殯雖有天子之命猶不敢況臨諸
臣乎周人有喪魯人有喪周人弔魯人不弔周人曰固
吾臣也使人可也魯人曰吾君也親之者也使大夫則
不可也故周人弔魯人不弔以其下成康為未久也君
至尊也去父之殯而往弔猶不敢況未殯而臨諸臣乎
立者不宜立者也公羊傳癸亥公之喪至自乾侯則曷為於戊辰之日然後即位正棺於兩
楹之間然後即位子沈子曰定君乎國然後即位即位
不日此何以日錄乎內也煬宮者何煬公之宮也立者
何立者不宜立也
立煬宮非禮也

左傳十五年春邾隱公來朝子貢觀焉邾子執玉高其容仰公受玉卑其容俯子貢曰以禮觀之二君者皆有死亡焉夫禮死生存亡之體也將左右周旋進退俯仰於是乎取之朝祀喪戎於是乎觀之今正月相朝而皆不度心已亡矣嘉事不體何以能久高仰驕也卑俯替也驕近亂替近疾君為主其先亡乎夏五月壬申公薨仲尼曰賜不幸言而中是使賜多言者也

穀梁傳高寢非正也

說苑春秋曰壬申公薨于高寢傳曰高寢者何正寢也

曷為或言高寢或言路寢曰諸侯正寢三一日高寢二
曰左路寢三曰右路寢高寢者始封君之寢也二路寢
者繼體之君寢也其二何日子不居父之寢故二寢繼
體君世世不可居高祖之寢故有高寢名曰高也路寢
其立奈何高寢立中路寢左右春秋曰天王入于成周
傳曰成周者何東周也然則天子之寢奈何曰亦三承
明繼體守文之君之寢曰左右之路寢謂之承明何曰
承乎明堂之後者也故天子諸侯三寢立而名實正父

子之義章尊卑之事別大小之德異矣

左傳秋七月壬申妣氏卒不稱夫人不赴且不祔也

葬定公雨不克襄事禮也 葬定妣不稱小君不成喪

也 公羊傳其言來奔喪何奔喪非禮也妣氏者何哀公之母也何以不稱夫人哀未君也定妣何以書葬未

踰年之君也有子則廟廟則書葬穀梁傳喪急故以奔言之妾辭也哀公之母也葬既有日不為雨止禮也

雨不克葬喪不以制也乃 哀公十夏五月昭夫人孟急辭也 不足乎日之辭也 二年

子卒昭公娶于吳故不書姓死不赴故不稱夫人不反

哭故不言葬小君孔子與弔適季氏季氏不絕放絰而

拜

公羊傳孟子者何昭公之夫人也其稱孟子何諱取同姓蓋吳女也穀梁傳孟子者何也昭公夫人也

其不言夫人何也諱取同姓也

禮記夫人之不命於天子自魯昭公始也

○雜記

左傳二十三年春宋景曹卒季康子使冉有弔且送葬

曰敝邑有社稷之事使肥與有職競焉是以不得助執

紼使求役與人曰以肥之得備彌甥也有不腆先人之

產馬使求薦諸夫人之宰其可以稱旌繁乎

已上季孫意如逐昭

公

左傳

哀公三年

秋季孫有疾命正常曰無死南孺子之子男

也則以告而立之女也則肥也可季孫卒康子即位既
葬康子在朝南氏生男正常載以如朝告曰夫子有遺
言命其圉臣曰南氏生男則以告於君與大夫而立之
今生矣男也敢告遂奔衛康子請退公使共劉視之則
或殺之矣乃討之召正常正常不反

禮記季康子之母死公輸若方小斂般請以機封將從
之公肩假曰不可夫魯有初公室視豐碑三家視桓楹

般爾以人之母嘗巧則豈不得以其母以嘗巧者乎則
病者乎噫弗果從 季康子之母死陳褻衣敬姜曰婦
人不飾不敢見舅姑將有四方之賓來褻衣何為陳於
斯命徹之 季孫之母死哀公弔焉曾子與子貢弔焉
閹人以君在弗內也曾子與子貢入於其廋而脩容焉
子貢先入閹人曰鄉者已告矣曾子後入閹人辟之涉
內靄卿大夫皆辟位公降一等而逆之君子言之曰盡
飾之道斯其行者遠矣○檀弓

左傳

十一

季孫欲以田賦使冉有訪諸仲尼仲尼曰丘

不識也三發卒曰子為國老待子而行若之何子之不

言也仲尼不對而私於冉有曰君子之行也度於禮施

取其厚事舉其中斂從其薄如是則以丘亦足矣若不

度於禮而貪冒無厭則雖以田賦將又不足且子季孫

若欲行而法則周公之典在若欲苟而行又何訪焉

十二年春王正月用田賦

國語季康子欲以田賦使冉有訪諸仲尼仲尼不對私

於冉有曰求來汝不聞乎先王制土藉田以力而砥其
遠邇賦里以入而量其有無任力以夫而議其老幼於
是乎有鰥寡孤疾有軍旅之出則徵之無則已其歲收
田一井出稷禾秉芻缶米不是過也先王以為足若子
季孫欲其法也則有周公之藉矣若欲犯法則苟而賦

又何訪焉

公羊傳何以書譏何譏爾譏始用田賦也穀梁傳古者公田什一用田賦非正也

禮記朝服之以縞也自季康子始也

○玉藻古文瑣語魯國多盜季康

子治之獲一人焉詰之曰汝胡以盜對曰此猶之乎蠶
蠶也慕蠶而附寧可已邪子大夫為政不能不盜何以

詰吾盜抑下蹠魯之民盜也爾其徒數千人驪山之陽
抉人肝而食之享年九十而邑宰不得問也子大夫陪
臣陽貨魯之家盜也國命出其手叛費囚桓以意行國
中自如寶玉大弓夫誰非先王所遺子孫世守之謂何
今貨偃然竊以遁也而子大夫不得問也子大夫之家
魯之國盜也名則魯臣實魯君焉國政為家事國賦為
家賦藐然魯君如無有焉而魯君不得問也魯君魯之
大夫也乾侯之難亦惟季孫意如之故不得正其終魯
君覲然不斥季孫之立而以為身則魯何以有王章也
逐一君復易一君而周天子不得問也吾儕小人其何
知知則於人而已矣子大夫與吾儕小人其俱負翳以
謀朝夕耳詰安用之康子曰辯哉盜也去之繫於獄中
已上季孫
斯專政

淮南子魯哀公為室而大公宣子諫曰室大眾與人處

則譁少與人處則悲願公之適公曰寡人聞命矣築室
不輟公宣子復見曰國小而室大百姓聞之必怨吾君
諸侯聞之必輕吾國魯君曰聞命矣築室不輟公宣子
復見曰左昭而右穆為大室以臨二先君之廟得無害
於子乎公乃令罷役除版而去之

莊子魯哀公問於顏闔曰吾以仲尼為貞幹國其有瘳
乎曰殆哉圾乎仲尼方且飾羽而畫從事華辭以支為
旨忍性以視民而不知不信受乎心宰乎神夫何足以

上民彼宜女與予頤與誤而可矣今使民離實學偽非所以視民也為後世慮不若休之難治也施於人而不忘非天布也商賈不齒雖以事齒之神者弗齒為外刑者金與木也為內刑者動與過也宵人之離外刑者金木訊之離內刑者陰陽食之夫免乎外內之刑者唯真人能之 莊子見魯哀公哀公曰魯多儒士少為先生方者莊子曰魯少儒哀公曰舉魯國而儒服何謂少乎莊子曰周聞之儒者冠園冠者知天時履句履者知地

形緩珮玦者事至而斷君子有其道者未必為其服也
為其服者未必知其道也公固以為不然何不號於國
中曰無此道而為此服者其罪死於是哀公號之五日
而魯國無敢儒服者獨有一丈夫儒服而立乎公門公
即召而問以國事十轉萬變而不窮莊子曰以魯國而
儒者一人耳可謂多乎

○莊子後於魯哀公遠矣此其
寓言 新論魯哀公好儒服舉

國皆著儒衣 說苑哀公射而中稷其口疾不肉食祠
稷而善卜之巫官巫官變曰稷負五種託株而役天下
未至於地而株絕獵谷之老人張社
以受之何不告祀之公從之而疾去

新序田饒事魯哀公而不見察田饒謂魯哀公曰臣將去君而鴻鵠舉矣哀公曰何謂也田饒曰君獨不見夫雞乎頭戴冠者文也足傳距者武也敵在前敢鬪者勇也見食相呼仁也守夜不失時信也雞雖有此五者君猶日淪而食之何則以其所從來近也夫鴻鵠一舉千里止君園池食君魚鼈啄君菽粟無此五者君猶貴之以其所從來遠也臣請鴻鵠舉矣哀公曰止吾書子之言也田饒曰臣聞食其食者不毀其器蔭其樹者不折

其枝有士不用何書其言為遂去之燕燕立以為相三年燕之政太平國無盜賊哀公聞之慨然太息為之避寢三月抽損工服曰不慎其前而悔其役何可復得詩曰逝將去汝適彼樂土適彼樂土爰得我所

禮記魯人有周豐也者哀公執摯請見之而曰不可公曰我其已矣使人問焉曰有虞氏未施信於民而民信之夏后氏未施敬於民而民敬之何施而得斯於民也對曰墟墓之間未施哀於民而民哀社稷宗廟之中未

施敬於民而民敬殷人作誓而民始畔周人作會而民始疑苟無禮義忠信誠懇之心以涖之雖固結之民其不解乎 孺子贛之喪哀公欲設撥問於有若有若曰其可也君之三臣猶設之顏柳曰天子龍輅而棹幃諸侯輅而設幃為榆枕故設撥三臣者廢輅而設撥竊禮之不中者也而君何學焉 悼公之母死哀公為之齊衰有若曰為妾齊衰禮與公曰吾得已乎哉魯人以妻

我○檀弓

左傳二十一年夏五月越人始來二十三年秋八月叔青如越始使越也越諸鞅來聘報叔青也

二十四年

公子荆之母嬖

將以為夫人使宗人釁夏獻其禮對曰無之公怒曰女為宗司立夫人國之大禮也何故無之對曰周公及武公娶於薛孝惠娶于商自桓以下娶於齊此禮也則有若以妾為夫人則固無其禮也公卒立之而以荆為太子國人始惡之 閏月公如越得太子適郢將妻公而多與之地公孫有山使告于季孫季孫懼使因大宰嚭

而納賂焉乃止

二十五年

六月公至自越季康子孟武伯

逆於五梧郭重僕見二子曰惡言多矣君請盡之公宴
於五梧武伯為祝惡郭重曰何肥也季孫曰請飲彘也
以魯國之密邇仇讎臣是以不獲從君克免於大行又
為重也肥公曰是食言多矣能無肥乎飲酒不樂公與
大夫始有惡

二十七年

夏四月己亥季康子卒公弔焉降

禮公患三桓之侈也欲以諸侯去之三桓亦患公之妄
也故君臣多間公游于陵阪遇孟武伯於孟氏之衢曰

請有問於子余及死乎對曰臣無由知之三問卒辭不
對公欲以越伐魯而去三桓秋八月甲戌公如公孫有
陘氏因孫于邾乃遂如越國人施公孫有山氏已上哀
公孫越
史記子寧立是為悼公悼公之時三桓勝魯如小侯卑
於三桓之家

禮記悼公之喪季昭子問於孟敬子曰為君何食敬子
曰食粥天下之達禮也吾三臣之不能居公室也四方
莫不聞矣勉而為瘠則吾能毋乃使人疑夫不以情居

瘠者乎哉我則食食

○ 擅弓已上
悼公之衰

史稱魯文公卒襄仲殺惡及視而立宣公由此公室
卑三桓彊顧三桓之彊起於東門之汰也僖公末年
季友卒而公子遂進至文公而得君益專夫文公魯
之惰君也三書不雨無勤民之心四不視朔鮮自強
之志其政日媮權柄下移遂則交聘列國史不絕書
雒戎之盟不待君命外挾齊晉之大內操震主之威
勢重所積不至易君之嗣不止也宣公即位唯齊是

依請婚請盟齊人聽焉惡與視齊出也齊何以棄惡而親宣蓋姜母無寵於齊齊又兩易君矣其視出姜不若魯市人也既而仲遂卒齊惠薨魯之君臣改轍事晉東門氏之子歸父復欲借晉之力去三桓以張公室計不克成宣公隕命行父巧獄蔽以殺適之罪而除之論仲遂之罪固在殺適而行父所忌在去三桓公償私怨子任父愆其孰信焉東門既去季氏遂彊此魯政所以逮三桓也成公嗣立事晉無懈晉厲

不道數以無禮加魯魯猶繼繼聽命無失常職此何以故晉霸主也魯多內難庶幾大國之鎮撫我乎詎意叔孫之孳子僑如通於君母欲去季孟而兼其室讒人罔極卻犢黷貨致令成公以後會得罪季孫以從君被執豈晉之君臣剛愎自用不可以禮義諫誨乎抑中冓之羞魯方諱之未肯直言邪聲伯抗論晉難乃平歸而刺子偃寘穆姜俾君蹈城賴之名國有克段之禍者僑如為之而僑如不殺魯於是為失刑

矣當成襄之際政固在大夫矣然而孟獻子家貧好
士國有令聞行父馬不食粟死無餘財季孟之忠儉
公室猶賴以不替及季孫宿為政專務自樹而公室
替矣其城費則都大於國其作三軍則權歸於家亦
嘗考伯禽之封魯乎費誓曰三郊三遂魯故有三軍
也僖公克復舊宇詩曰公車千乘公徒三萬依然大
國之賦也宣成以來軍政日壞私乘反多於公車宿
欲專國之柄為毀私以補公三家各帥一軍而公臣

不能成三耦至昭公五年復毀中軍季孫有其二焉
政由季氏祭則寡人而已其作也魯政猶可為也其
毀也魯政不可問矣宿也將欲毀之必姑作之叔孫
穆叔位居亞卿幹蠱承家為魯良臣弗能禁其不作
也猶欲禁其不毀於是詛於僖閔盟於五父然則穆
叔生而存中軍不可得而毀已天未贊魯豎牛作難
南遺之流因助逆以滋禍昭子賢而未定位亦莫如
之何也春秋痛公室之大壞自季孫宿始是以作軍

必書舍軍必書意如嗣政益成鳩張之形昭公不度
遂應鸛跖之讖矣始昭公之立年十九而猶有童心
穆叔知其不終而季孫必立之彼固利其有童心也
伐莒取鄭之役意如身為主兵而孟叔為之副其恣
肆無君將而不誅豈一日之積哉昭公弗忍一旦欲
起而圖之其勢固已難濟況事出倉卒非有深謀遠
慮即公亦原無去之之心皆左右讒人交構以成其
難輕舉速禍固敗是求異乎亡國之君不可與圖存

也方公之將伐季氏也子家羈曰季氏得民久矣君
無多辱及公徒之敗也又曰諸臣偽劫君者而公止
及公之出奔也又曰齊君無信不如早之晉公皆不
聽居鄆五年莫能反國其在乾侯也荀躒以意如來
羈曰君與之歸又曰君以一乘入魯師公欲聽之而
脅於從者卒至客死其舉事也無謀其處難也無斷
是誠天下之至愚矣且鄆雖小邑若能撫而有之其
為少康一旅未可知也奈何興役無度民弗堪命未

幾而鄆潰矣傳曰昭公出奔民如釋重負民之所棄
用一邑猶不足矧能用一國邪春秋亟欲存公每書
公在於歲首而魯人則無公久矣宋元郊公卒于曲
棘叔詣叔婣無病而死季氏即詭於衆曰天將棄公
非我罪也晉齊受賂借口緩師孟叔之子藉季自庇
用以陰陽休咎之說煽惑震動外結據鞅之權佞內
離成鄆之人心公既孤立反集衆尤越在外野噉然
而哭誰能無君不聞攘臂以討亂賊而皆緩追以長

姦究為李孫者何所忌憚而不逐君也哉且意如於公之初伐則登臺請罪於叔孫之歸則稽顙求改於乾侯則賈馬歸衣於適厯則跣行伏對哀色巽辭偽守臣節大國亦將信之公乃奮怒誓河罔肯悔禍是臣愈姦而君愈疎臣愈黜而君愈庸始猶惴焉懷可去之罪終則汰然成不可去之形矣公薨喪歸廢嗣立弟定公在位如贅旒爾三世之專已成四君之弱不振尚何望於後之人乎既而魯用孔子弗克有終

三家並僭不復知有冠之在上履之在下也降及哀
公式微已甚乃欲結越以除內患是昭公所不行於
季氏者哀公欲行於三家越師未出吾見公之亡而
不反矣讀春秋終篇為齊痛田氏為晉痛三卿為魯
痛三桓乃至三卿分晉田氏傾齊之後三桓之子孫
亦微公族自戕其本根未見有克昌厥世者也然則
周公其遂衰乎

繹史卷八十